

清

史

稿

清史稿

列傳一百三十三

恒瑞

慶成

七十五

富志那

高麗

恒瑞宗室隸正白旗吉林將軍薩喇善子乾隆中授侍衛赴西藏辦事擢熱河都統遷福州將軍五十二年臺灣林爽文作亂命率駐防兵往勦參贊軍務偕總督常青赴南路鳳山賊勢方熾高宗知常青恒瑞不可恃命福康安督師賊圍總兵柴大紀於諸羅恒瑞駐軍鹽水港逗留不進詔解任福康安至屢爲疏陳戰績帝益怒斥其徇護逮恒瑞論罪事平減死戍伊犁尋予副都統銜充伊犁參贊大臣歷定邊左副將軍綏遠城將軍調西安嘉慶元年命率駐防兵三千偕都統永保會勦湖北教匪三月與總兵文圖破賊竹山永保至合師由房縣進勦文圖分勦三里坪喇叭洞諸賊悉盡而恒瑞追賊至保康未大創之賊首姚之富踞襄陽勢甚熾命恒瑞進勦五月偕明亮進次呂堰擊賊岳家溝劉家集禽斬二千餘賊圍棗陽設伏王家岡誘賊敗之又敗之於蔣家壩曲家灣

襄陽圍解賊僞降潛襲官軍後路急以後隊爲前隊擊退之賊走丫兒山與張家壩賊相犄角奮擊一晝夜破賊營十餘殲賊甚衆被獎賚七月破賊隨州龍門山與永保會攻鍾祥賊巢連破之鄧家河黑沙河雙溝賊乃分竄唐縣呂堰追至漣沅鎮復竄倉臺尋之富渡滾河圍景安於鄧州詔斥諸將玩誤逮永保責恒瑞戴罪立功二年正月偕惠齡等勦襄陽賊賊首劉起榮就禽又與慶成敗賊鄭家河禽賊目李潮進勦泰山寺龍鳳溝禽賊目姚爽等賜花翎於是賊分竄由河南入陝恒瑞追賊至山陽遇王廷詔李全等擊走之五月追賊陝南與惠齡夾攻於黃龍壩殲賊三千餘廷詔全復與賊之富合趨紫陽渡漢江恒瑞坐縱賊奪花翎賊遂分路入川廷詔竄開縣雲陽萬縣犯夔州西與大甯賊響應恒瑞追及連敗之乃竄太平八月當陽逸匪掠白河洵陽命馳赴興安扼勦偕慶成擊賊於張家灘由牛蹶嶺繞出賊前奪賊營九廷詔等奔紫陽與惠齡夾擊敗之恒瑞率師還漢中敗賊西鄉又敗之褒城黃沙鋪十一月之富等西奔將渡漢北竄偕慶成暨諸半渡賊西趨甯汭師進遇高均德於桑樹灣乃

議四面設伏恒瑞令撒拉爾回兵假鄉勇旗幟誘之自山山梁馳下慶成等分路夾擊俘斬甚衆捷聞被倭資十二月破王廷詔於保甯進解營山圍三年川匪羅其清犯順慶偕慶成往援因賊勢蔓延請勒保宜縣遣兵會勦賊竄蓬州潛結冉文偉擾儀隴恒瑞扼磨盤寨與惠齡等合擊之文偉敗走陝匪龍紹周與合敗之楊柳寨六月與德楞泰夾擊高均德於石人河復偕惠齡攻老林場賊卡進逼大神山均德文偉踞險死拒分路進攻賊奔箕山而徐天德樊人傑爲將軍富成追擊窮蹙亦入焉惠齡德楞泰攻其前恒瑞攻其後盡破山寨先後斬馘近萬其清李全王廷詔奔大鵬山進圍十一月克之命赴陝與宜縣等會勦張漢潮未幾李全樊人傑竄西鄉帝以恒齡未迎擊嚴斥之四年署陝甘總督赴甯羌擊藍白兩號賊張應祥等竄秦州兩當又擊走張漢潮冉學勝股匪五月解署任勦白號賊於白馬關地與川西龍安接壤遣將冒雨掩擊賊竄西和禮縣令布政使廣厚總兵吉蘭泰截勦自趙賈家店黑馬關鈔擊藍號賊敗之於老柏樹復花翎賊竄川北至秋折回陝境擊走之乃赴城固洋縣會明

亮勦張漢潮破之東西又河賊殺馬堽道遁老林要之於清水溝復乘霧雨徐渡三渡水帝疑諸將縱賊又以恒瑞前勦藍號賊垂盡捨之回陝下尙書那彥成察劾那彥成恒瑞之婿也覆陳回師出總督松筠意得免罪尋明亮殲漢潮恒瑞自五郎追擊餘黨李得士等由大建溝入老林趨秦嶺與那彥成會勦冉學勝等賊奔澇谷扼兩岔河追擊於山陽東溝敗之五年川匪二萬餘由略陽寇兩當徽縣恒瑞自褒城入棧賊竄隴州清水秦安偕那彥成追至汪家山大敗之總兵甯德戰歿秦安恒瑞赴援復偕那彥成敗賊於龍泉溝深都堡總兵多爾濟札普戰歿洵陽詔促恒瑞赴鎮安五郎勦賊三月抵唐藏楊開甲高均德方擾南星留總兵觀祥駐守自赴商州帝疑其趨避累詔詰責乃赴鎮安勦冉文勝等敗之於大中溪會額勒登保破開甲於輝峪恒瑞自龍駒寨鈔截開甲逸走固副將李天林於漫川關馳援斬賊目羅貴等賊乃分路西竄叙功予雲騎尉世職六月率總兵德忠駐守太渠唐藏時伍金柱高天德馬學禮犯西鄉提督王文雄戰歿乃進兵大石川賊奔灘口爲楊遇春所破恒瑞自教匪起

久在行間以偏師數臨大敵至是老病久無顯功帝慮其不任戰詢額勒登保上其狀命回鎮西安逾年卒

慶成孫氏漢軍正白旗人提督思克曾孫都統五福孫也由鑾儀衛整儀尉累遷廣東督標副將乾隆五十三年從總督孫士毅征安南屢禽敵有功賜花翎耶阿巴圖魯勇號內擢正白旗漢軍副都統戶部侍郎御前侍衛正紅旗護軍統領五十七年出爲古北口提督嘉慶元年率兵赴南陽襄陽勦教匪偕恒瑞迭敗姚之富劉之協於雙溝張家集賊屯棗陽丫兒山分踞張家營連營十餘里遮官軍慶成先進襲其寨大破之禽宋廷貴陳正五追敗餘匪於紅土山禽黃玉貴加太子少保之富竄鍾祥合劉起榮張富國等衆五六萬偕永保等冒雨攻克之晉太子太保賊遁雙溝擾唐縣漣沱鎮慶成等以久戰兵疲不能聞勦詔嚴斥之賊竄棗陽太平鎮四路合攻斬數千級慶成受矛傷被優資十一月潛渡滾河北竄與永保等並被嚴譴盡奪宮銜花翎勇號易惠齡爲總統尋偕惠齡連破賊於王家城梓山二年正月大戰興隆集斬二千餘級分路追賊

慶成射中賊首劉起榮禽之在諸將中戰最力高宗以慶成爲五福孫不次擢用自縱賊滾河慮其少年自用不能服衆命惠齡察奏至是詔免前罪二月擊賊曾家店胸中矛裹創而戰賊敗竄河南境分數路慶成追李全連破之確山五里川盧氏火燄溝四月李全王廷詔合陷鄆西馳復其城賊不戰分遁未幾之富竄渡漢江降二品頂戴暫留提督任襄匪竄開州偕惠齡追敗之南天峒火燄壩復花翎賊趙大甯與川匪合慶成與川軍會勦九月偕恒瑞截擊湖北回竄之賊於洵陽而李全王廷詔沿漢東走慶成登舟下漢以要其前惠齡恒瑞從陸蹙其後至紫陽夾攻之賊竄興安慶成一晝夜追及大破之司渡河川匪王三槐擾保甯羅其清冉文僞分掠川東命移兵赴川與宜縣合勦三年截擊其清骸中槍創甚解任回旗就醫四年創愈仍在御前侍衛行走尋授成都將軍命赴陝西與永保協勦張漢潮會明亮計奏永保慶成失機命那彥成松筠按治褫職逮問又以在湖北受軍需饋遺籍其家漢潮旣殲宥罪戍伊犁未行五年正月命仍赴陝軍効力額勒登保檄勦高天德馬學禮連敗之禮辛鎮

何家衢禽斬數千予三等侍衛協勦伍金柱曾柳授陝安鎮總兵七月金柱與冉學勝張天倫合犯陝扼之渭河賊分竄追天倫於教場壩麻池溝殲其黨宋麻子又敗金柱餘黨曾芝秀於南山兼署固原提督時經略赴川陝甘兵三萬餘皆歸慶成節制川匪冉天元冉學勝樊人傑先後渡漢江詔斥慶成疏防責戴罪立功六年徐天德樊人傑復至江岸欲偷渡郢西擊却之實授提督擊楊開甲餘匪於廣元獲其子麟生加頭品頂戴苟文明潛入甘肅境擊走之復勇號追川匪辛聰等於甯汭禽其黨曾顯章張添潮七年敗張天倫餘黨於鳳縣兩當禽張喜魏洪升賊竄紫柏山老林裏糧入捕悉殄其衆復太子太保先是慶成父歿軍事方亟不得去至是南山匪漸少乃許回旗守制尋署湖北提督服闋實授遷成都將軍十一年入覲帝睹其勢問曾戴雙眼花翎否慶成對征安南蒙賜和珅禁勿用獲劉起榮先帝欲賜復爲和珅所阻命軍機處檢檔無之遂以欺罔褫職戍黑龍江逾年授圍場總管歷馬蘭鎮總兵湖北提督福州將軍十七年卒諡襄恪

七十五瓜爾佳氏滿洲正黃旗人乾隆中以護軍從征緬甸繼赴金川戰輒力
累遷護軍參領授貴州大定協副將總督福康安薦其才四十九年擢宜昌鎮
總兵父憂去官坐事降秩起爲健銳營前鋒統領五十七年從征廓爾喀克濟
隨又克熱索橋追賊東覺山雍雅山攻甲爾古拉並有功擢翼長嘉慶元年赴
湖北勦教匪二年四月追賊入陝敗之山陽周家河授西安右翼副都統兼領
健銳營其冬王三槐回竄四川追擊於達州厓峯尖傷右臂踰日賊復至裹創
力戰斬獲甚衆三年擢四川提督敗賊巴州七月戰廣木山克險隘受傷被優
賚九月擊冷天祿於木瓜坪右股中槍創甚就夔州療治四年始瘳六月連破
賊於寶塔蓮花池扼其入楚之路會卜三聘竄大甯追敗之八月禽龔建於開
縣火峯寨十月與穆克登布夾擊樊人傑於通江巴州界上賊走太平他賊自
湖北回竄偕朱射斗迎擊於雲陽遂追賊川東時賊聚賊北而東路久無軍報
適侍郎廣興疏言七十五駐兵夔州仁宗疑其逗留下經略察狀七十五方以
攻糜子坪受重傷額勒登保爲疏辯得白五年二月鮮大川擾縣蝗坪創發不

能騎昇至軍前督戰冉天元擁衆渡嘉陵江重慶戒嚴魁倫檄令回守病不能
軍遣李紹祖率兵赴川西自就醫順慶帝疑其飾辭詔解任命松筠勒保察驗
得實以提督銜留營差遣五月高天德馬學禮由陝犯川折入番地偕阿哈保
夾擊於舊關摩天嶺克新寨進圍鐵鎚寨賊乘雨宵遁追擊之賊棄牲畜仗械
驚竄山谷由草泥土司地走岷州又走秦州七月兵經新甯偵馬驛溝有賊設
伏敗之仍授四川提督賊勢趨重川境德楞泰勒保方進勦七十五分擊之至
冬諸賊相繼窺漢江德楞泰議擊之南岸而以七十五出廣元三家壩攻其西
北七十五不聽調曰兵深入將逼賊入陝非計也帝聞切責之六年正月率子
武隆阿由廣元趨南江擊張世龍於三臺山後河嶺北溪河陣斬世龍禽其黨
趙建功李大維又追賊至太平華尖山禽耶天富周一洪被優叙三月攻竹園
坪五月賊分竄陝楚七十五追冉天士至平利大渝河問道據後山偪其出隘
伏起邀擊禽斬二千餘特詔嘉寶乘勝追賊入湖北境六月破湯思蛟劉朝選
於羊耳河又敗之於保康殲賊首王鎮賢遂與德楞泰追龍紹周入川七月偕

李紹祖敗樊人傑於麟水追至開縣復遇思蛟朝選連敗之於馬家亭桑樹坪
山通城進勦苟文懷禽之餘賊與苟文明合將竄陝八月擊之於大甯山殲禽
及牛文明僅身免俘其家屬是年冬留防川北敗賊於南江又與德楞泰合擊
於廣元蒼溪進搜老林賊多散匿百十爲羣時有斬獲十二月苟文明糾各路
餘匪二千餘人乘間西奔七十五與勒保不合追賊入山懷半載不至兵飢疲
就糧太平六日賊已渡嘉陵江上游直趨階州亟偕慶成馳擊額勒登保德楞
泰先後効其頓兵縱寇未幾賊復自廣元渡江入甘肅帝益怒嚴詔褫職逮問
七十五故宿將勇而訥臨陣輒死鬪身被重創十五次將弁畏其苦戰不樂相
隨自領偏師當艱險數以軍報後時遭譴至是復失機就逮一軍皆慟哭額勒
登保等爲疏陳戰狀乞恩許留營自贖七年勦張長庚陳白得殘匪於夔州留
防川東舊創發予護軍校還京逾年卒贈副都統銜賜卹如例子武隆阿自有
傳

富志那赫舍哩氏滿洲正紅旗人起健銳營前鋒從征葉爾羌緬甸金川授副

前鋒參領出爲湖南永綏協副將乾隆六十年苗叛駐守永綏苗踞張坪亞保阻糧運悉衆來犯富志那擊却之追至獅子山嗣知有伏預爲戒備夾攻多所斬獲越日苗復以數千人撲營殊死戰簡精銳迎擊大敗之賜花翎永綏被圍久糧芻且盡居民隨官軍晝夜登陴城賴以固大軍至圍迺解從福康安克高多寨吳牛生就禽福康安薦其老成明幹苗民咸畏擢總兵迭攻高斗山禽頭坡吉吉寨皆捷賜蟒衣一襲嘉慶元年湖北教匪聶傑人張正謨於枝江宜都倡亂巡撫惠齡駐軍太和山富志那馳赴之進擊鳳凰山禽傑人餘賊乘兩撲營擊却之又敗之於楊白堰正謨踞灌灣腦四面環山富志那自萊家坡進冒兩奪卡而伏隊於深箐賊至左右夾擊多墜巖洞死山前設疑兵別由徑道深入出不意擊之大捷賜號法福禮巴圖魯迭克難公山王母洞進攻箐箕嶺正謨勢蹙四出求救富志那與副都統成德分路設伏僞樹白幟爲援兵誘賊出大破之遂克箐箕嶺乘勝取灌灣腦禽正謨枝江宜都悉平命回苗疆治善後二年議開永綏北路留兵二萬分防黔楚授富志那爲總兵駐鎮筸與提督分

領其軍苗嗣自同知傅鼎築砦屯田邊備漸嚴而苗未遠服搆衆抗拒大吏駭過於鼎將勦之富志那力爭迺止移軍需助其建設後屯田利興苗患遂息人稱鼎功兼頌富志那不置云五年鎮尊鹽金塘黑苗出掠與鼎併力禦擊又要擊苗黨於狗慧岳焚其寨苗懼乞降八年永綏苗龍六生擾動禽之署湖南提督調授貴州提督軍政肅然時稱名將十五年卒於官亮祿伊爾根覺羅氏滿洲正紅旗人襲輕車都尉世職授密雲協領嘉慶初以參將發河南署游擊五年教匪窺河南巡撫吳熊光駐防廬氏兵多他調寶豐郟縣賊起掠汝州布政使馬慧裕不嫻軍事亮祿曰兵貴神速今賊初起烏合易滅請兼程往勦賊屯寶豐翟家集東阻大溝恃險不退亮祿聲言京兵且至樹八旗大纛鞭馬腹俾騰蹕嘶號聲震數里賊懼夜吹角而進躍馬踰壕火其寨一鼓殲之禽其渠李岳等奏入仁宗大悅立擢副將累遷雲南開化鎮總兵七年卒帝甚惜之論曰恒瑞慶成勦力襄陽勦匪最久後皆獨當一面功過不掩故仁宗始終保全七十五孤軍苦戰徒以失權羣帥未奏顯功論者惜之富志那獨平枝江宜

都一路移鎮苗疆與傅肅和衷弭亂有足稱焉

清史稿

列傳一百三十四

楊遇春

字子國
號快
興縣人

羅思舉

字
號
包相

楊遇春字時齋四川崇慶人以武舉効用督標爲福康安所識拔從征甘肅石峯堡臺灣廓爾喀咸有功累擢守備六十年調赴苗疆力戰解嗅腦圍進援松桃獨取道樟桂溪山險塞密率敢死四十人爲前鋒由間道縱馬入賊屯呼曰大兵至矣降者免死賊相顧錯愕復呼曰降者跪於是跪者數千人直抵城下圍遂解賜花翎復解永綏圍賜號勁勇巴圖魯首逆吳牛生就禽擢游擊額勒登保攻茶山爲賊所圍遇春率壯士衝擊奪據對山縱橫決盪當者輒靡福康安望之驚歎立擢參將復乾州擢廣東羅定協副將苗平而教匪起嘉慶二年從額勒登保赴湖北剿覃加耀林之華破芭葉山連敗之長陽宣恩建始恩施加耀竄終報樂峭巖陡絕夜縋而登禽加耀及其黨張正潮三年從額勒登保赴陝敗李全於藍田又敗高均德於紫溪嶺五月還湖北張漢潮竄穀城兜擊

大敗之又敗之竹山菩提河追蹙入陝敗之於平利孟石嶺九月敗高均德李全於廣元吳家河丁父憂賜金治喪命墨絳隨征迭破羅其清於觀音坪大鵬寨青觀山其清就禽擢甘肅西甯鎮總兵四年從額勒登保斬蕭占國張長庚獲王光祖斃冷天祿功皆最威震川陝婦孺皆知其名追勦張子聰自夏徂秋迭敗之於渠山雲陽太平開縣通江間子聰被追急數與樊人傑龔建冉天元合最後欲合王登廷登廷踞馬鞍溝進攻克之蹙追迭擊禽其黨斬有年於土丫子斬阮正濤於廣元雲霧山至冬登廷由陝入川與冉天元合額勒登保率遇春與穆克登布合擊之於蒼溪貓兒壩穆克登布違約先期進挫敗遇春據廢壘力拒燃草炬擲山下戰徹夜幸得全師迭擊皆獲勝登廷子身至南江爲鄉團禽獻斬之五年擢甘州提督偕穆克登布破張天倫於兩當又從額勒登保追楊開甲於商維扼龍駒寨殲張漢潮餘黨劉允恭劉開玉子雲騎尉世職遇春與穆克登布爲經略左右翼長議每不合自蒼溪戰後益不相能額勒登保等疏言諸將中惟遇春謀勇兼優可當一面請益所部兵與經略參贊分路

勦賊遂以提督別領偏師沿渭西上勦汧隴之賊五月擊伍金柱於漢陰手扳巖及銅錢窖戰方酣楊開甲從間道突至腹背受敵自午至酉圍愈急有白袍賊手大旗直犯遇春相去咫尺忽墜馬則爲後隊護槍所斃乃金柱悍黨龐洪勝也賊驚潰額勒登保兵亦會追賊至洋縣茅坪斬開甲又禽陳傑於大石坂八月斬金柱於成縣峽溝斬宋麻子於鳳縣潘家溝六年破冉學勝於石泉石塔寺高天德馬學禮王廷詔爲大軍所驅竄五郎壩遇春方追學勝偵知之乘夜掩擊天德等分竄乃由斜峪關蹣跚擊阻其入甘肅之路復破賊於銅鋪廠一晝夜馳四百里追及廷詔於川陝界鞍子溝禽之天德學禮竄禪家巖遇春料賊由甯羌奔逸急由斜谷趨二郎壩設伏龍洞溪賊果至俘斬殆盡二賊就禽晉騎都尉世職是役釋降衆健者八百人編爲一隊皆願效死曾經略檄合勦冉學勝獲諜得賊虛實謂降衆曰汝等立功贖罪此其時矣至紫陽天池山賊於伏莽中突起八百人力戰衝賊爲數段遂大捷張天倫糾五路賊聚洵陽學勝復與合大破之於孫家坡追賊入川禽冉天泗王士虎於通江報曉埽土虎

故劇盜專劫寨峒避大軍遇春夜往捕適賊由他路襲營遇春不回救伏巢外候賊歸禽斬無遺賊中有名號者勦除幾盡餘匪以老林爲藪遇春專任搜勦以遲緩嚴詔切責七年秋殲苟文明調固原提督尋以大功戡定詔遇春功尤著殲首逆獨多晉二等輕車都尉八年丁母憂賜金給假四十日苟文明餘黨苟文潤集千餘人皆獷悍蹂躪漢江左右諸軍久役不振遇春至乃奮連戰紅山寺平溪河殲之賊氛漸清十年凱撤詔許回籍補持母服百日假滿入覲會審陝鎮兵變鎮兵新設入伍者多鄉勇降賊不易制總兵楊芳赴固原攝提督因停給鹽米銀發包穀充糶遂戕副將游擊劫庫獄以叛遇春行至西安聞變偕巡撫方維甸馳往詔德楞泰赴陝治其事命遇春扼方柴關賊銳甚兵交數失利賊首蒲大芳望見遇春下馬遙跪哭訴營官餽饌狀遇春曉以順逆知可以義動與楊芳謀同主撫諸帥尙猶豫遇春按兵緩攻令芳單騎入賊營諭之越數日大芳竟縛倡逆之陳達順陳先倫詣遇春降遂率大芳邀擊餘賊於江口斬其渠朱先貴德楞泰疏陳叛兵窮蹙乞命請釋歸伍詔斥縱叛廢法降遇

春寧陝鎮總兵大芳等二百餘人皆戍新疆十三年入覲命兼乾清門侍衛仍授固原提督十八年天理教匪李文成踞滑縣命陝甘總督那彥成討之以遇春爲參贊賊萃精銳道口鎮遇春率親兵八十人沿連河西進覘之遇賊數千即突擊賊辟易追渡河禽斬二百收隊少二人復衝入賊陣奪二屍還賊爲喪氣遂斷浮橋焚渡船進攻賊望見輒靡尋克道口復擊走桃源輝縣援賊合圍滑城用地隧轟破之文成自焚死十二月滑縣平封二等男爵賜黃馬褂陝西南山賊萬五倡亂十九年正月移師往討斬萬五及其黨凡兩越月蒞事督一等男陞見仁宗慰勞有加命至膝前執其手曰朕與卿同歲年力尙強將來如有軍務卿須爲朕獨當一面手賜珍物見遇春長髯稱美者再時遇春弟逢春爲曹州鎮總兵命繞道視所練兵宣宗即位加太子少保賜雙眼花翎道光五年署陝甘總督六年回曾張格爾叛詔遇春率陝甘兵五千馳赴哈密尋命大學士長齡爲揚威將軍遇春爲參贊會兵阿克蘇進勦七年二月連收賊于洋阿巴特沙布都爾阿瓦巴特禽斬數萬追至渾河距喀什噶爾十餘里賊悉衆

抗拒列陣二十餘里曾大風霾前隊迷道未即至將軍欲退屯十餘里須臾而進遇春不可曰天贊我也賊不知我兵多少又虞我即渡時不可失且客軍利速戰難持久乃遣千騎繞趨下游牽賊勢自率大兵乘晦霧驟渡上游礮聲與風沙相併乘勢衝入賊陣賊大奔三月朔遂復喀什噶爾甫旬日英吉沙爾葉爾羌和闐以次復加太子太保張格爾遠遁詔遇春先入關八年正月楊芳禽張格爾於鐵蓋山遇春入覲捷音適至帝大悅賜紫韁寶授陝甘總督圖形紫光閣遇春坐鎮陝甘凡十年務持大體不輕更張討寇軍實鎮馭邊疆皆有法十五年以老子告歸召至京陛辭管封一等昭勇侯食全俸御製詩書扇賜之十七年卒於家贈太子太傅兵部尙書賜金治喪入祀賢良祠鄉賢祠諡忠武遇春結髮從戎大小數百戰皆陷陣冒矢石未嘗受豪髮傷仁宗詢及歎爲福將治軍善於訓練疲卒歸部下即膽壯或精銳改隸他人仍不用命將戰步伐從容雖猝遇伏不至失措俘虜必入賊三月以外始誅老稚皆赦免馭降衆有恩尤得其死力操守廉潔治家嚴整子弟皆謹守其家風弟逢春久隨軍中積

功授重慶鎮標游擊後從賽冲阿平陝西洋縣匪累擢山東曹州鎮總兵調充州鎮子國佐四川茂州管都司加副將銜國植字海梁以舉人入貲爲戶部郎中出任潁州知府累擢河南布政使洎回疆底定宣宗推恩就擢巡撫疏請留其父部將訓練河南兵武臣父子同時膺疆寄與趙良棟岳鍾琪兩家比盛焉遇春歿襲侯爵服闋授山西巡撫歷官皆有聲道光二十一年擢閩浙總督尋以體疾乞歸在籍食俸數年卒遇春尤知人獎拔如不及識楊芳於卒伍中力薦之卒爲大將勳名與之埒天下稱二楊自有傳部曲多洊至專閫著者曰吳廷剛祝廷彪游棟雲廷剛四川成都人由行伍征苗擢守備從遇春勦教匪善偵敵嘉慶四年破王登廷於青龍坪擢都司五年勦楊開甲辛聰於龍駒寨倍道掩襲敗賊輝峪峒伍金柱踞手扳巖輕騎往探獲賊諜馳報得大捷追張天倫至馬桑壩高天升戴仕傑由箭桿山突出迎擊大敗之擢游擊六年孫家坡之戰分追餘賊至關垵奪據山頂賊多墜崖死擢參將追高見奇姚馨佐至通江山徑紆險棄馬行見賊數十人奪路走禽其酋乃辛斗也通江賊李彬夜竄

熊家灣廷剛先至橫衝賊爲二後賊回竄與大軍夾擊大破之禽魏中均苟朝萬王士元七年迭擊辛聰劉永受於老君嶺菜子坪太平峒燕子巖賊四竄偕祝廷彪徒步入山追賊田峪將歸隊過桃川沙壩見山樹紅旗疑之偵知賊首苟文明冒官軍舊號敗之分路要截禽斬數百文明將入川追至花石巖見山上炊烟起麾兵仰攻文明知不能脫擲跳巖下就斬之又禽殲苟七麻子吳廷詔張芳等八年搜勦南山餘匪往來老林九年賊聚川陝邊界廷剛至桃木坪賊乘霧衝撲受矛傷窮追越楚境迭敗之石渣河元喜坡進攻馬鞍山賊伏陡崖徑馳上禽賈燦華苟文華王振謝尙等賊遁老山偕祝廷彪選健卒持乾糲輕騎踰勦徧歷險僻至十年禽斬殆盡擢甘肅涼州鎮總兵調漢中鎮十八年勦三才峽匪萬五別賊起古子溝分兵克之萬五乘間連踞硃寨敗之於袁家莊平木山梁分兵鈔襲設伏沙壩禽其黨周在庭周之順萬五窮蹙竄盤屋山中爲他軍所禽進勦餘黨禽尹朝貴劉功十九年事平詔廷剛首先進勦功最加提督銜尋擢廣東陸路提督未至卒詔念前勞予優卹諡壯勤廷彪四川雙

流人山行伍征苗擢守備嘉慶五年從遇春殲劉元恭劉開玉擢都司六年禽
王廷詔擢游擊七年勦賊平安寨設伏長溝乘夜掩擊中矛傷裹創力戰斃苟
文清於陣偕吳廷剛殲苟文明於花石巖禽苟文齊於鼉鍋山擢參將又破張
世雲於北溝口八年迭擊賊於老林小岔溝白果園禽冉璠九年偕羅思舉追
賊入界嶺老林攻望都觀賊巢從遇春擊賊鳳凰寨壩口馬鞍山並多斬獲十
一年擢漢中協副將值甯陝兵變赴南山截勦甫定瓦石坪周士貴復起偕羅
思舉合擊禽之賜號迅勇巴圖魯十四年擢甘肅甯夏鎮總兵調陝西西安鎮
十九年勦三才峽匪萬五餘黨偕吳廷剛禽尹朝貴於木瓜園分路勦賊黃草
坪燬其巢追入手扳巖老林賊詭降設伏禽其渠陳四擢湖南提督道光三年
內召授頭等侍衛仍兼提督銜以熟悉南山情形未幾復授西安鎮總兵在任
凡十年擢貴州提督調浙江提督二十年英吉利兵陷定海守招寶山吏議礙
職詔留任尋以年老休致歸卒於家庭彪果敢力戰善撫士卒當時降衆多生
事所部帖然世稱之棟雲四川巫山人寄籍華陽以武舉補把總從征廓爾喀

苗疆積功累擢甯羌營游擊從額勒登保勦教匪與遇春偕後乃爲其部將攻終報寨先登功最嘉慶三年從遇春追張漢潮詹世爵李槐等由漢中入川境諸軍合勦於隘口棟雲據高俯擊斷槐手箭貫世爵胸皆斃漢潮竄梅子關迎擊敗之又連敗之巴東及陝境兩河關設伏王家河賊至痛殲之窮追至河南盧氏漢潮遁四年春敗賊涼沁河兵僅五百斬獲三百餘級賊走龍駒寨屯康家河棟雲蹠之忽山坳突出悍賊中矛傷戰愈力射殪執旗者賊乃却事聞特詔嘉獎四月漢潮踞紅門寺冒雨出間道擊走之扼之黑龍口與明亮興肇爲犄角谿水漲潛涉上游襲擊賊大潰又冒雨克樂家河八月敗賊鞏澤坪竄石峽子棟雲設伏野雞溝與大兵夾擊漢潮窮蹙入老林分路追勦禽李潮於張家坪而漢潮已爲明亮擊斃至是獲其屍擢甘肅提標參將五年擢安慶協副將敗冉學勝於沔陽連擊高天德馬學禮於獅子梁櫻桃埡六年春復破之於五郎坪鳳凰山天德學禮爲遇春所禽餘黨踞八斗坪棟雲分隊襲之禽羅鳳友又破伍金柱餘黨於三公坪至七年春所部凱撤擢狼山鎮總兵父憂去官

十一年授河州鎮西甯番族出擾棟雲專勦貴德一路破賊甘壩山連敗之六哈圖河什尖里幹汪科合山遂克沙卜浪賊巢進至紅露井番僧昂寶率十二族降焚其巢番境悉平以母憂去起補陝安鎮調寧夏鎮十八年從遇春勦南山匪數戰於隴州沔陽禽賊渠二十三年標升江芝誣訐棟雲侵饗下總督察治得白抵芝罪棟雲坐私役兵丁褫職詔赴遇春軍委用道光初署鹽茶都司乞病歸卒

羅思舉字天鵬四川東鄉人少有膽略躡捷踰屋如飛貧因爲盜秦豫川楚間結客報仇數殺不義者遭阨幸不死久之自悔教匪起充鄉勇誓殺賊立功名王三槐踞東鄉豐城爲巢衆數萬官軍莫敢擊出掠羅家壩團勇不習戰思舉見賊前鋒數百詭呼曰數十人耳衆氣倍擊走之游擊羅定國使偵豐城還報請率死士夜擣之官兵外應可一舉滅定國以爲狂思舉憤獨携火藥往乘烈風燔之賊黑夜相蹂殺走巔巔踣死無算遂奔南壩場是役一夫走賊數萬聲震川東總督英善給七品軍功隸副都統佛住川賊以羅其清冉文儔徐天德

王三槐爲最強徐王二賊合窺東鄉思舉請佛住嚴備勿聽乃爲知縣劉清說其清降知其詐馳歸則賊已陷東鄉狀佛住清亦拔營去時嘉慶二年正月也調苗疆凱旋兵猶未至總兵索費音阿率甘肅兵來援用思舉策紮營大團堡開壕樹柵埋火藥誘賊入藪之遂奪金峨寺賊巢復東鄉賊竄重石子香爐坪德楞泰明亮並以兵會思舉請仍如破豐城事德楞泰壯之隻身夜入賊營會大雨火藥不燃賊覺懼而遁自是常將鄉勇分路爲奇兵與官軍犄角或爲前鋒殲孫士鳳於淨土庵又敗賊於峨城山皆以火攻劫營獲捷時川賊與襄陽賊齊王氏等合雲陽教黨亦起應獲諜知王三槐將赴陳家山即假所獲賊旗夜馳往聲言白號賊至賊下山迎悉誘殲之禽賊首高名貴其黨張長庚覺而奔追斬甚衆擢千總三年總督勒保誘禽三槐其黨冷天祿踞安樂坪環攻不下召思舉往夜率死士焚其巢將明殿旅出大呼曰我豐城劫寨羅思舉也賊膽落潰圍走思舉戰績至是始上聞擢守備德楞泰圍羅其清等於箕山復召思舉問計思舉相地勢曰賊各隘皆壘石守惟山後懸削數十丈必恃險乏備

若官軍攻於前使不暇他顧我率勇敢者梯而上可搗也如其言夾擊大破之
餘賊四逸思舉料其必走方山坪率鄉勇先往伏坪後越數日賊爲官軍追擊
果至禽斬幾盡遂獲其清四年其清餘黨踞東鄉四季坪從提督七十五破之
秋敗賊巴州豆眞坡又援田朝貴於鐵爐山五年春德楞泰勦冉天元於川西
檄思舉率鄉勇三千赴軍戰青龍口賊踞山險選精銳九十人夜薄賊巢破之
賊分趨農安將入陝思舉獻計請致書額勒登保約守陽平關易裝潛入賊卡
殺二賊衆追捕乃棄所寶書逸出賊果不敢前回竄江油思舉先驅深入伏起
奮鬪而賊以擋牌禦矢銃困德楞泰於馬蹄岡急趨救使鄉勇人取石亂擊毀
擋牌會冉天元馬蹶就禽賊瓦解賊旗追逐餘匪斬雷士旺攻鮮大川於天
寨子山險不能上德楞泰遣箭手五百助之令伏巖下先以鄉勇誘賊俟播石
且盡仰射箭落如雨賊退避遂克之思舉手禽賊六十餘人德楞泰誦其輕生
聲色俱厲思舉跪謝良久出則冠上已換花翎由是深感德楞泰樂爲盡力尋
從勒保防嘉陵江七十五以桂瀚新敗調思舉代領所部鄉勇擢都司六年殲

張士龍於鐵溪河擊援賊陳天奇陣斬之賜號蘇勒芳巴圖魯擢游擊自是轉戰老林餓不時至煮馬糲啗賊肉以追賊七十五卞急屢爲賊所窘賴思舉援救得捷旣而七十五坐事逮德榜奏攻苟文明於瓦山溪賊踞楠木坪三戰不克召思舉率鄉勇至皆衣狗皮躡草履人笑爲勾兵夜越後山伏一戰破之殲苟朝獻苟文學衆訖曰勾兵破賊矣始補給餼製衣履擢參將七年迭敗度向瑤於風峒子萬古樓破齊國黠於通江殲張天倫魏學盛於巴州秋擊劉朝選於仙女溪通鞋底山禽之又偕羅聲皋禽張簡羅道榮於巴州冬唐明萬竄大甯追至石柱坪賊方食奮擊大潰禽明萬仁宗以明萬劇賊久稽誅特詔嘉賚諸賊漸就殲除搜捕南山餘孽兩年始清擢太平協副將十年德榜奏勦甯陝叛兵檄思舉赴軍尋就撫盡釋歸伍思舉曰兵變殺將陷城破官軍亂無大於此者反賞是勸叛也何以懲後請誅首逆以申國法諸將不可後川陝兵果數叛十一年思舉攻西鄉叛兵斬首逆於陣風稍息署川北鎮擢涼州鎮總兵未之任調重慶鎮二十年中階對番酋洛布七力叛夾河築碉總兵羅聲皋不

能克許其降以專擅遣戍命思舉進剿克四紫洛布七力就殲請分其地以賞上下瞻對諸出力頭目事乃定道光元年擢貴州提督歷四川雲南湖北提督十二年湖南江華錦田寨搖趙金龍爲亂與長甯趙福才糾合九冲搖肆掠提督海凌阿戰死勢益熾詔總督盧坤偕思舉討之至永州議退賊南甯斷其西道州零陵祁陽山徑進兵兜擊於是驅諸搖出山皆東竄常甯洋泉鎮檄各路進遏合圍四月大破之金龍中鎗死禽其妻子及死黨數十賜雙眼花翎予一等輕車都尉世職時命尙書禧恩督師未至軍先三日奏捷禧恩方貴寵用事怒其不待盛氣陵之思舉曰諸公貴人多顧忌思舉一無賴受國厚恩至提督惟以死報不知其他禧恩無如何則詰金龍死狀虛實思舉獲其屍及所佩印劍木偶爲證乃止二十年卒於官賜太子太保諡壯勇子本鎮襲世職思舉旣貴嘗與人言少時事不少諱檄川陝湖北各州縣云所捕盜羅思舉今爲國宣勞可銷案矣再入覲仁宗問何省兵精曰將良兵自精宣宗問賞罰何由明曰進一步賞退一步罰皆稱旨晚年自述年譜川中殄諸劇寇多賴其力功爲人

掩軍中與二楊並稱楊芳於諸將少許可獨至思舉以爲烈丈夫嘗酒酣袒身示人戰創班班爲父母封股痕凡七其忠孝盖出天性云同時起鄉勇者桂涵名與之亞包相卿較後出亦至專閩涵亦東鄉人少恃勇橫行鄉里亡命出走繼歸與思舉同應募爲鄉勇父天聰聚族黨屯礪子山賊數爲涵所窘欲報之萬衆來攻涵率壯士伏隘誘賊入空寨痛殲之嘉慶二年從朱射斗攻金峨寺賊突出圍涵於山峒火熏水灌皆不傷反多斃賊賊乃走尋戰淨土庵偕思舉陷陣大破之徐天德黨衆幾盡殲同里聞其屢捷爭來投効德楞額秦明亮特編涵字營使涵領之擢千總由是知名三年大軍圍安樂坪冷天祿詐降出走涵偵知之伏兵於方家壩魚鱗口賊至伏發禽斬甚衆擢守備四年從德楞額秦追賊入陝每由間道出賊前與官軍夾擊數捷又從朱射斗殲包正洪於雲陽盧花嶺從七十五破駝建於開縣火峯寨手禽建以獻擢都司五年復從射斗破賊雲陽禽其渠李甲縱歸招出黨衆數百人自是降者日至旣而改隸勒保軍始與思舉分路轉戰川東西所至有功累擢游擊六年從阿哈保追湯思蛟於

墊江賊夜走涵謂窮寇且死鬪請先伏魏家溝俟其至突擊大破之又從薛大烈追李彬冉天士於通江至小中河大雪賊不爲備涵率鄉勇夜半薄賊壘與官軍四面乘之賊奔曠野勁騎衝踏盡殲焉彬遁未幾爲劉清所獲自七年後復偕思舉徧歷老林搜剿匪累遷夔州協副將九年秋從經略參贊圍餘匪於太平火燒梁山峻無路涵議守此相持雖數月無如賊何山下小溪通民峒賊久困必出劫峒糧請以步卒伏山後賊果以驍銳千餘潛出諸將皆死戰半日殲之前山自潰遂殄滅淨盡川陝肅清十一年冬綏定兵叛涵在梁山聞變慮本部兵與通軍騎馳入郡城聲言越兩日出兵密令弟吉出募鄉勇舊部爲一隊約期合攻時賊踞景市廟將往麻柳場涵至令急赴景市廟中途改趨麻柳場距賊數里止隊入深箐謀報賊踰千且至吐曰安得有此衆戒毋輕進毋漏言涵至旣而賊自山衝下三進三退乃突起擊賊而弟吉已率五百人據山頂賊大潰禽首逆王德先叛兵起事甫五日一鼓平之賜號健勇巴圖魯十三年署重慶鎮尋授川北鎮總兵十九年擊三才峽匪黨吳抓抓等於沔縣走之

川北獲安道光二年擢四川提督果洛克番匪劫西藏堪布貢物命勦禽首逆曲俊父子被優賞在任十載遇番夷蠢動兵至輒定十三年討越嶲夷匪連戰皆捷忽遘疾卒於軍優卹贈太子太保諡壯勇子三人並晉官秩相卿鄰水人嘉慶六年以鄉勇隸松潘鎮標常從思舉擊陳朝觀於通江龍鳳垭追賊受矛傷裹創力戰七年破張天倫於巴州金子寺相卿斬天倫穀子山下給藍翎八品頂戴又殲張簡唐明萬功皆最十年思舉偵襲賊王世貴謝應洪匿太平老林檎相卿蹙捕殲之授千總十二年勦瓦石坪叛兵擢守備累遷廣元營游擊十三年調征臺灣會峨邊越嶲獠夷叛命回川從提督楊芳赴勦攻克喇嚕里夷踞曲曲烏烏斯坡相卿梯絕壁牽挽負礮而上破之進燬巴姑賊寨擢參將十五年獠夷復叛攻克峨邊十三支夷巢破越嶲沈喳夷抵濫田壩兩廳叛夷悉降累遷懋功協副將勦馬邊夷禽其渠加總兵銜再署建昌鎮總兵總督鄂山寶興皆以邊事倚之十九年病歸卒

論曰川楚之役竭宇內之兵力而後定之材武驍猛萃於行間然攻無不勝攻

無不取者厥惟二楊及羅思舉爲之冠遇春謀勇俱絕劇寇半爲所殲思舉習於賊情地勢險阨強梁非其莫克至於忠誠忘私身名俱泰遇春際遇之隆固爲稀覯而思舉以藪澤梟傑終保令名煥於旂常矣鄉兵出平鉅寇亦自其爲始云

清史稿

列傳一百三十五

賽沖阿

滿洲正黃旗人襲雲騎尉世職充十五善射授健鋒營參領

札克塔爾

桑吉斯塔爾

綸布春

格布春

薛大烈

烏魯特

馬瑜

圖爾其

賽沖阿赫舍里氏滿洲正黃旗人襲雲騎尉世職充十五善射授健鋒營參領征臺灣力戰賜號斐雲額巴圖魯圖形紫光閣歷吉林三姓副都統嘉慶二年率吉林兵赴四川始終隸德楞額泰麾下張漢潮等竄平利敗之樹河口又敗之大甯黑虎廟追齊王氏姚之富入甯羌山中要之羅村壩以勁騎橫衝賊陣往來擊射大破之三年春破高均德於洋縣金水鋪躡追至安子溝賊夜突營偕總兵達音泰躍壘而出斬賊千餘齊姚二賊復與均德合擾安康師次判官嶺賊隱深林道數百人誘戰賽沖阿鼓勇先入敗之賊走山陽截擊於壩店遂與明亮德楞泰三路進逼大破之於郢西三岔河齊姚二賊投崖死叙功被珍寶四月分勦均德於華州連敗之洋縣茅坪關西溝均德合諸賊奔渠縣大神山

會諸軍克之自秋徂冬迭克箕山大鵬寨青觀山遂禽羅其清冉文儒功皆最
四年夏敗徐天德於開縣旗桿山敗張天倫於太平修溪壩秋龔文玉踞夔州
八石坪從德楞泰進攻破賊寨追敗之竹谿大禾田禽文玉冬擊高均德於大
市川遂破高家營禽均德進兵川北殲張金魁於通江空水河禽符曰明等於
廣元野人村復移軍川北迭敗苟文明鮮大川於貓兒梁馬家營五年春從德
楞泰由陝回川西擊冉天元於江油新店子又大戰馬蹄岡並深入遇伏先挫
後勝天元就擒詳德楞泰傳乘勝破賊劍州李家坪石門寨俄而張子聰雷世
旺犯蓬溪圍成谷太和仁和仁義四寨偕溫春往援斬世旺破冉天泗王士虎
於南江長池壩破鮮大川苟文明於岳池新場擢固原提督命赴陝專勦高天
德馬學禮諸賊德楞泰素倚吉林馬隊賽冲阿尤得衆心士卒聞其將去環跪
乞留累疏陳狀請權緩急暫留川尤之秋從德楞泰擊趙麻花王珊於雲陽寒
池壩濫泥溝並殲之冬敗楊開第李彬齊國謨於觀音河六年春破高天升於
鎮安野雞坪殲之又破唐明萬等於和岡溪進至黃花廟賊夜犯營奮擊潰走

夏從德楞泰擊徐天德樊人傑等於白河黃石坡禽陳朝觀偕溫春破天德於甯陝兩河口磴之於紫陽仁和新灘天德赴水死授西安將軍謀報龍紹周由川入楚率勁騎蹙擊先俘其妻子復殲其兄紹華弟紹海至平利岳家坪冒雨雪縱兵衝踏陣斬紹周併蕭四餘匪盡殲之予騎都尉世職冬迭破劉朝選於東鄉土黃壩奉節大甯邊境七年春又大破之潘家槽禽斬殆盡朝選僅以千餘人逸敗宋國品於梁山柏林槽禽席尙文於東鄉袁家壩與勒保部將夾擊陳自得於大竹鄰山大破之調甯夏將軍夏從德楞泰赴楚勦樊人傑人傑與蒲天寶相犄角迭敗人傑於雞公山譚家廟又克天寶於大壩口人傑竄平口河腦自黃茅壩進逼之無去路人傑投河死額勒登保檄赴陝駐太平河截勦川楚竄匪是冬大功戡定詔諭諸將戰績以賽沖阿與楊遇春居最予輕車都尉世職九年調西安將軍命偕德楞泰檢捕南山殘匪隨同奏事尋以遲延降騎都尉賊平還舊職調廣州將軍十一年春海盜蔡牽犯臺灣命副德楞泰往討會牽爲李長庚擊走乃專任賽沖阿爲欽差大臣提督以下受節制尋責專

辦陸路至則鳳山已復南北兩路僅餘零匪請停調兩粵福州駐防兵水師責成李長庚陸路責成許文謨詔嘉其曉事調福州將軍秋牽復入鹿耳門檄鎮將擊沈賊艦十一獲船十禽賊目林略等十二年蔡牽朱潰皆窮蹙乃赴本官十四年調西安尋調吉林十六年入覲途見岫巖復州流民奏下副都統松霖安撫會松霖疏請驅逐流民出境詔斥其誤命如賽沖阿所議行十七年調成都將軍二十年勦陝西南山匪連破之木竹壩太陽灘進薄漢北凡兩月肅清封二等男爵賜雙眼花翎二十一年廓爾喀與披楞構兵互請援命賽沖阿行邊防之而已誤會上旨馳檄諭詰復請越境脅以兵威詔斥貪功構釁奪雙眼花翎降二品頂戴尋以兩國言和復之二十二年召爲正白旗漢軍都統御前大臣領侍衛內大臣尋授盛京將軍二十四年復召爲理藩院尙書兼御前諸職如故宣宗即位加太子太保賜紫韁管理咸安宮蒙古唐古忒忒諸學道光元年出爲西安將軍三年入祝萬壽賜宴玉瀾堂列十五老臣繪像御製詩褒之四年召授內大臣鑲藍旗蒙古都統充總諮達六年以疾乞休尋卒贈太

子太師命皇子賜奠諡襄勤子額圖渾三等侍衛孫特克慎襲男爵坐事除名
曾孫清福襲官四等侍衛溫春默爾丹氏滿洲正黃旗人由拜唐阿累擢三等
侍衛從征廓爾喀乾隆五十九年高宗幸南苑行圍以殺虎超擢頭等侍衛明
年從征苗疆連克蘇麻寨大烏草河賜號克酬巴圖魯大戰尖雲山與總兵達
音泰分將左右軍晝夜鏖鬪遂復乾州苗平從德楞泰赴四川嘉慶二年敗賊
東鄉馬耳溝又敗齊王氏姚之富於夔州白帝城加副都統銜充領隊大臣駐
守竹谿平利賊來犯並却之李潮張世虎餘黨走渡漢率索倫騎兵蹴之於中
流殲賊千三年破高均德殲齊王氏姚之富破羅其清冉文儔四年破張天倫
禽張文王禽高均德諸役皆與賽沖阿同爲軍鋒名績相埒方高家營之未破
也賊扼大市川倚險抗拒鼓勇先登馬蹶易騎而上殺賊獨多詔特嘉之五年
授正紅旗蒙古副都統江油新店子及馬蹄岡之戰並分當一路瀕危克捷冉
天元餘黨與張子聰度向瑤等合竄潼河西岸追及渡口殲其後隊千餘迭敗
賊於蓬溪中江秋借賽沖阿擊鮮大川於新場借薛大烈擊湯思蛟於倒流水

從勒保擊虔向瑤於長壩皆捷六年偕賽冲阿殲徐天德其秋擊龍紹周於湖北境紹周合衆萬餘已進和岡溪後隊攻天平寨誘戰而伏千賊截官軍後賽冲阿擊攻寨者溫春扼溪口以要伏賊遂入峽攻其中堅大敗之追斬紹周於岳家坪子雲騎尉世職七年偕賽冲阿敗劉朝選於土黃壩分兵破虔久正於潘家槽禽之又偕賽冲阿破樊人傑於平河口腦陣斬其弟人禮及二子人傑走死是年功歲被優賚凱旋授虎槍長正紅旗護軍統領十一年甯陝兵變赴陝協勦十五年充烏里雅蘇台參贊大臣行抵烏蘭博木圖病卒帝憫之命其子護喪歸予祭葬子烏凝襲世職官至護軍參領色爾滾莫爾丹氏黑龍江正黃旗人由打牲兵襲佐領從征廓爾喀以功賜號托默歡巴圖魯遷副總管嘉慶二年從德楞泰勦教匪三年殲齊王氏姚之富於鄧西受槍傷擢協領合攻箕山破賊於順水寺郭家廟廖家碛及賊由青觀山敗竄要擊於濛子灘禽羅其清又敗冉文蔚於麻壩寨四年春擢總管從德楞泰入陝破高均德於大市川禽之色爾滾戰功居最五年從戰馬蹄岡冉天元負創逸追至包家溝天元

就禽又敗賊於石門寨風如井鐵山關加副都統銜夏截擊劉朝選於東鄉茨竹林踞擊張子聰等於九亭場進搗通江長池壩冉天士賊巢皆敗之秋勦鮮大川苟文明於巴州元口鎮沿江兜截與大軍合擊斬賊渠吳耀國鮮文炳禽苟文禮又擊湯思蛟趙麻花於茅坪倒流水冬殲麻花於大禾田被獎叙六年從德楞泰入陝禽髡如一高天升合擊龍紹周徐天德先後禽殲冬擊苟文明於槽子溝陷陣被創七年從德楞泰追樊人傑入楚馳三百里繞其前又偕蒲尙佐破蒲天寶於鮑家山徒步入賊巢天寶走死詔嘉其奮勇命在乾清門侍衛行走又殲戴仕傑於興山施家溝八年搜勦餘匪肅清被優叙歷阿勒楚克副都統伊犁領隊大臣十四年叛兵蒲大芳等在戍所煽亂將軍松筠令色爾滾往誅之詔嘉所使得人召京授鑲藍旗蒙古副都統歷伯都訥阿勒楚克副都統十八年命協勦滑縣教匪李文成遁設伏白土岡敗之賊固守司寨毀垣入登樓殺賊文成自焚死加都統銜予雲騎尉世職歷黑龍江副都統呼倫貝爾辦事大臣道光七年乞病給全俸十三年卒賜金治喪諡壯勇子明晉孫濟

克扎布襲佐領兼雲騎尉蘇爾慎蘇都里氏滿洲正黃旗人黑龍江馬甲從征
廓爾喀嘉慶初從德楞泰勦教匪積功授三等侍衛改隸京旗五年馬蹄岡之
戰初不利德楞泰憩山上賊至馳下奮擊蘇爾慎射冉天元馬應弦倒天元就
禽賊遂大潰論功最擢二等侍衛乾清門行走其冬攻大壩口陷陣被創賜號
西林巴圖魯六年戰紅花塢鯢魚壩追賊至陝境黃石坂首先躍馬衝入賊陣
禽賊渠魁士應方文魁尋殲徐天德樊人傑苟朝獻戰皆力七年破鳳皇山鷄
公梁桂林坪先登奪隘軍中號爲勇敢凱旋擢頭等侍衛十八年林清黨犯禁
城聞警入首先殺賊加副都統銜命爲領隊大臣率巴圖魯侍衛赴山東勦教
匪詔稱其材武出衆可當百人愛惜之戒勿步戰破曹州武定賊巢十一復偕
提督馬瑜破賊於滑縣潘章村禽賊目郭明山事定回京授鑲紅旗蒙古副都
統充上書房讀達二十四年上幸熱河乘馬蹶蘇爾慎控止之擢鑲藍旗蒙古
都統道光元年隨扈昌陵馬逸突乘輿降藍翎侍衛逾年以二等侍衛休致未
幾卒贈副都統銜阿哈保鄂拉氏滿洲正黃旗人由司轡護軍授侍衛從征臺

灣解諸羅圍禽林爽文賜號錫特洪阿巴圖魯圖形紫光閣繼從征廓爾喀擢二等侍衛苗疆事起轉戰最力論功居上等迭擢頭等侍衛正黃旗蒙古副都統嘉慶二年命率吉林兵赴襄陽借景安勦教匪擊賊於獨樹塘楓樹埡禽斬甚衆三年追賊入川合攻大神山分克插旗山卡賊盡殲之四年合擊徐天德於渠河又破之於譚家壩賊大潰冬設伏白水碛殲賊千餘被獎叙五年冉天元等犯川西禦之場院失利責領新到貴州兵戴罪立功從德楞泰擊天元獨當火石埡一路先敗後勝冬偕薛大烈擊楊開第於安仁溪山梁追越大山數重至兩台山所過賊寨皆下開第伏誅被優賚擢御前侍衛六年秋復偕大烈擊青黃藍三號賊於巴州石梁山分路設伏夜襲之殲戮二千餘授正紅旗護軍統領並賜其子阿顏托克托爲藍翎侍衛搜勦老林禽老教首鄧金祥予雲騎尉世職尋合擊高見奇等於大茅坪因病赴達州醫療七年召回京逾歲以恩駕神武門陳德突御輿失於防護職予副都統銜在乾清門行走歷正白旗蒙古副都統正紅旗護軍統領十年病加都統銜遂卒依都統例賜卹子阿

顏托克托襲世職兼三等侍衛

綸布春羅佳氏滿洲鑲白旗人以黑龍江學團駐京授司轡從征廓爾喀苗疆賜號色默爾亨巴圖魯累擢二等侍衛嘉慶元年襲創克驃馬岡險隘加副都統銜平隴賊寨尤固綸布春從獅子坡入囊土填壕毀牆柵出間道撫其背大軍進薄石隆遂禽石柳鄧二年苗平從額勒登保勦湖北教匪破林之華於芭葉山追賊紅土溪鐵鑛坡羅錫圍迭敗之授鑲藍旗蒙古副都統三年禽單加耀於終報寨移軍入川敗高均德於野猪坪擊李全等於紫溪嶺賊走湖北額勒登保自漢江下襄陽令綸布春將騎兵由陸出平利遇張漢潮於南漳敗之於菩提河孟石嶺殲賊數千尋漢潮與詹世爵李槐合衆可二萬偕明亮扼之清池子山口漢潮先遁世爵槐於隘口抗拒綸布春以勁騎截擊木石並發賊窘多觸崖死世爵槐並殲焉秋從額勒登保擊高均德於吳家河口賊自林中出矛傷左脇力戰敗之進攻張公橋禽漢潮子正澹及劉朝佐等四年春械送諸賊至京命偕侍衛十八人解饒回川坐報侍衛等患病失實降黜未幾敗漢

潮於黃牛鋪諸軍合擊之張家坪漢潮就殲綸布春獲其屍擲乾清門侍衛迭
破餘賊於教場塢藥塢茨溝板房子那彥成疏陳戰結超衆屢詔褒賚五年隨
那彥成出資難遏白號賊北犯破之於龍山鎮授鎮黃旗蒙古副都統黃號賊
分屯連營十餘里綸布春潛師先破八里灣回擊牛灘嶺賊傍秀金山列隊以
拒徑衝入陣手刃數賊遽却進援狼卡寨扼石峽口夾擊大敗之夏偕穆克登
布擊楊開甲於七盤溝而高天德馬學禮犯漢中提督王文雄戰死詔責綸布
春專勦敗之於白溪俄冉學勝渡漢北將與伍懷志合偕總兵汪啟邀擊於留
壩又會諸軍敗之於太吉河魚洞河六年春以追勦學勝久無功被劾視職以
馬甲留營効力從穆克登布擊伍懷志於五郎鐵鎖橋率三十人先驅衝敵殺
賊數十賊據山拒關躍登橫擊賊衆披靡追擊於紅水河徒步奮戰奪山梁詔
嘉其愧奮授藍翎侍衛復偕穆克登布躡賊偵知潛匿老林一層窺地險絕督
兵撲升而上懷志與黨六七十人惶急投崖下爲綸布春所獲授二等侍衛復巴
圖魯其冬病卒於漢中依頭等侍衛議卹格布舍鈕祜祿氏滿洲正白旗人父

薩克丹布以吉林新滿洲留京爲前鋒乾隆中從海蘭察征石峯堡臺灣有功累擢三等侍衛賜號伯奇巴圖魯圖形紫光閣又從額勒登保征苗疆擢二等侍衛遂從勦教匪破芭葉山其大金坪抱窩山兩戰尤力以病解軍事久之始卒臨歿仁宗念前勞加副都統銜格布舍亦起前鋒累遷三等侍衛隨父赴苗疆平隴之役從額勒登保克嚴人坡大壩角諸寨賜號庫奇特巴圖魯及赴湖北黃柏山戰頗有功又殲逃賊於巫山嘉慶四年殲冷天祿奏諸將功格布舍第一上夙知其將門子善用鳥槍特嘉經略所列公允加副都統銜五年偕楊芳夾擊楊開甲於兩岔河陷陣被創墜馬躍上再戰追斬其衆子恩騎尉世職又偕楊遇春殲伍金柱宋嗣富六年禽王廷詔及高天德馬學禮功皆最晉雲騎尉世職其冬擊辛斗於黑龍洞七年從額勒登保追勦苟文明冒雨深入老林文明就殲留川陝邊界檢捕殘匪凱旋授正黃旗漢軍副都統乾清門行走十二年出爲伊犁領隊大臣尋授甯夏副都統召還授鑲紅旗漢軍副都統十八年命往河南勦教匪將行值匪犯禁城急入捕賊被優獎命充領隊大臣率

火器營赴軍迭敗賊於道口進圍滑縣收援賊於城北掘東門墜道爲賊覺復據西南隅穴成火發格布舍仍攻東門以雲梯先登獲賊目徐安國於地窖擢御前侍衛予騎都尉世職遷正藍旗護軍統領坐失察部下私携俘獲子女議褫職帝曰格布舍出兵時聞警由德勝門奔赴大內朕不忍負之改留任予副都統銜頭等侍衛在大門行走旣而直乾清門帝閱步射中三矢賞黃馬掛攏甯夏將軍道光初回疆軍事起命駐哈密爲聲援調烏里雅蘇台將軍移師守吐魯番八年召爲正白旗蒙古都統復出爲甯夏將軍十年卒諡昭武子秀倫襲騎都尉

札克塔爾張氏滿洲正黃旗人初金川土番也父爲索諾木所殺年未二十密獻入番路徑於將軍阿桂隨征游攔守備高宗憐之命隸內務府旗籍擢二等侍衛乾清門行走兼正白旗蒙古副都統嘉慶四年從尙書那彥成赴陝軍擊高天德馬學禮於灰峪林又擊川匪於龍草坪五年偕綸布春夾擊白號賊於秦安龍山鎮禽賊渠余禮等賜號瑚爾察巴圖魯又偕擊王廷詔楊開甲於牛

蹶鎮由山梁蹶下馬蹶復起力戰大破之遷鎮白旗護軍統領那彥成破張天倫於岷州林家鋪轉戰鞏昌文縣賊據河岸且擊且濟逼賊郭家山自中路仰攻禽高天德子狗兒又偕綸布春破伍金柱楊開甲於分水嶺是年夏召那彥成還京札克塔爾留聽額勒登保節制每戰猛銳無前軍中號曰苗張楊開甲等竄湖北間道邀擊於鄖西黃陂鋪禽斬千餘予恩騎尉世職偕楊遇春破伍金柱於手板厓銅錢營殲楊開甲於茅坪詔以是役得其分擊之力優予賚敘諸賊循渭東竄札克塔爾邀擊於寬灘乃折趨棧道帝厯陝事急趣其還軍乃偕慶成駐襄城西鄉兼顧川楚竄匪高天德馬學禮窺渡漢從額勒登保鈔截屢敗之六年元旦破賊五郎坪踞伍懷志餘黨於瓦子溝禽教首彭九泉遇賊南鄭狼渡礮躍馬衝賊爲二禽其渠王波高夏追冉學勝於棧東夜襲黃安壩賊營破之偕楊遇春夾擊於天池山突占山梁禽其黨陳學文追敗之竹谿革鞋峽賊竄陝又偕遇春夾擊姚馨佐曾芝秀於南唐嶺劉家河口諸賊尋與學勝合又敗之孫家坡渭子池與遇春同被襲寶七年從額勒登保追勦苟文明

賊匿太白山老林隙於山巔軍至即遁札克塔爾以圍捕非計撤辛峪口兵勝之果出晝夜追奔扼其三而偕楊遇春夾擊於鎮安石門清賊復竄老林屢出屢入詔斥曠日持久褫職留任歷數月獲文明妻子始復之八年凱旋充奏事處領班扈駕回宮入神武門有男子陳德突犯御輿札克塔爾手禽之封三等男爵十一年甯陝兵變從德楞泰往勦戰於方柴關不利既叛兵就撫德楞泰以震懾乞降奏上召札克塔爾詢狀斥其隱飾褫職留男爵回四川以副將用尋予副都統銜充科布多參贊大臣十三年召還授護軍統領兼武備院卿十七年卒賜金治喪子常安襲爵桑吉斯塔爾滿洲正黃旗人亦四川土番應募征金川歷石峯堡廓爾喀之役賜號察爾丹巴圖魯累擢頭等侍衛改隸內務府滿洲嘉慶四年與札克塔爾同赴陝軍迭敗張漢潮於黃牛鋪二耶壩洵陽壩追漢潮就殲加副都統銜連擊教場壩大壩韭菜坪並下之五年隴山鎮林江鋪郭家山諸戰皆與札克塔爾俱又殲劉允恭於陝境大中溪敗伍金柱於鎮安手扳厓被優叙尋金柱爲楊遇春所殲其餘黨西走要其去路躡追自文

縣甯羌至龍安擊之賊竄打箭鎗寨山徑險隘棄馬徒步及於窄口子痛殲之分兵擊木蘭溝伏賊僅存二百餘人遁三岔河與冉學勝合詔斥遲留額勒登保爲疏辯得自六年偕札克塔爾迭敗賊於狼渡礮天池山孫家坡賊自孫家坡敗竄桑吉斯塔爾設伏楊柏坡以待禽斬幾盡高見奇就誅被獎叙是冬召回京八年偕札克塔爾捕陳德子騎都尉世職十一年率巴圖魯侍衛赴甯陝勦叛兵及還坐召對遲到降頭等侍衛尋授正藍旗漢軍副都統十八年率火器營赴滑縣勦賊以火攻克城先登復在御前行行走坐軍中携俘童當黜原之又坐事褫副都統仍以頭等侍衛乾清門行走二十三年卒賜金優卹子策楞訥爾三等侍衛襲騎都尉請葬父於近京允之賜葬資焉

馬瑜甘肅張掖人祖良柱官四川松潘鎮總兵遂寄籍華陽瑜少以武生入伍從征廓爾喀苗疆累遷游擊嘉慶元年赴達州勦教匪戰大圍堡安子坪數有功賜號達春巴圖魯三年從德楞泰殲齊王氏姚之富於鄖西瑜間謀功居多擢參將擊高均德於維南鐵釘埡賊奔就冉文僊合踞大神山諸軍合擊瑜攻

其東克之及攻大鵬寨瑜冒雨燬其南門四年春文儔就禽授四川督標副將從德楞泰入楚禽高均德尋赴援陝廿五年春復從德楞泰回川西擊冉天元戰江油新店子進攻重華堰深入火石埡瑜分路助擊有功追賊石門寨開封廟至嘉陵江岸迭敗之又設伏收藍號匪於七孔溪克長池壩賊巢擢貴州安義鎮總兵調重慶鎮瑜祖故溫福部將勅保與有舊甚倚之又久從德楞泰爲翼長軍事多所贊畫八月白號度向瑤竄長壩將渡河瑜率步騎掩至壘之向瑤赴水逸六年春徐天德自洵陽北竄留後隊於峪河口前隊奪渡漢江追及乾溝禽斬千餘賊奔鎮安雪夜間道出野豬坪要之時龍紹周分黨入太平老林自率大隊赴楚欲與天德合壘之竹山官渡河夜聞追騎聲爭赴水漂溺泰半夏從德楞泰追天德破之黃石坂進逼昆河鋪賊勢瓦解天德竄死河灘遂偕賽沖阿等追紹周入川戰菜子埡雲霧溪皆捷賊西趨陝冬殲紹周於平利岳家坪於是黃號略盡又敗賊於通江劉家壩俘獲甚衆七年春師次巫山十二峯檢捕線號殘匪夏擊樊人傑等於東湖鷄公山梁又敗蒲景於大埡口人

傑走死冬追賊老山施家溝山徑險陁徒步而入禽其渠趙鑑殲餘匪於中子
洋偵巴巫界上有匿匪月夜擣其巢悉殲之被獎賚時賊勢窮蹙瑜自巫山向
北搜勦八年禽王三魁於馬家壩三槐之弟也會楚匪復逼入川偕色爾滾破
之鎗盡窩餘匪殆盡三省設防瑜駐川界徐家壩擊陝境逸匪殲之九年擢江
南提督調雲南皆未之任留辦善後殲湖北竄匪苟文華等被優賚尋坐添紫
城疏防奪巴圖魯花翎率兵二千入老林追賊攻克鳳凰寨禽斬數百既而苟
文潤就殲復花翎勇號十年赴本官歷江南直隸提督十八年從車駕幸熱河
校射中三矢賜黃馬褂其秋滑縣賊起命偕總督溫承惠進勦破南湖北湖賊
進擊道口尋赴開州搜捕燬潘章李家莊袁家莊諸賊巢事平優叙十九年調
江南坐事左遷徐州鎮總兵調兗州鎮二十四年復任江南提督未幾卒以前
勞優卹諡壯勤藩尙佐四川松潘人由行伍拔補千總從征苗疆累擢游擊嘉
慶三年從德楞泰殲齊王氏姚之富於鄖西賜號勁勇巴圖魯克箕山有功擢
參將五年偕馬瑜合擊藍號賊於陡坎子山大破之擢四川維州協副將圍趙

麻花於石虎林賊夜突圍者三皆擊却次日盡殲焉被獎叔六年從德楞泰破高天升於洵陽江岸追至二峪河雪夜出山徑進攻天升就誅擢雲南鶴麗鎮總兵敗龍紹周於茅壩迭敗徐天德於廟坪黃石坂又追擊於川陝境上每戰輒殲數百遂蹙入楚沿路搜剿及紹周爲賽仲阿等所殲其餘黨竄竹山圍剿殲戮無遺七年從德楞泰轉戰川楚諜知樊人傑屯杉木嶺蒲天寶屯代峰別有賊屯雞公山爲聲援先破之人傑走霧露河尙佐迎擊轉戰七晝夜斬獲無算天寶走當陽偕色爾滾偵蹤追擊賊收殘衆屯興山桂連坪襲破之賊走踞鮑家山德楞泰衝其前尙佐等攀危崖繞山賊巢上痛殲之餘賊狂奔出山僅數百人竄入老林天寶被追急墜崖死被優賚兼乾清門侍衛又偕副都統富僧德殲戴仕傑於興山禽崔連樂崔宗和於房縣斬陳仕學於巴東八年青號劉渣鬍子與黃號陳大貴踞老鴉寨尙佐乘霧雨襲之賊棄寨循當陽河走遇富僧德伏兵爭赴水死禽大貴駐巫山搜捕餘匪賊氛遂淨十三年擢湖南提督調甘肅二十年以病解職歸卒

薛大烈甘肅皋蘭人由行伍從征臺灣廓爾喀累遷都司嘉慶二年從總督宜
絲勦教匪由陝入川數有功擢游擊三年迭克賊於白沙河蘭場時王三槐踞
東鄉安樂坪勒保令劉清招降清道劉星渠偕二武員往留爲質三槐偕至大
營星渠密請禽之大烈爭曰舍守備千總二員易一賊喪國體失軍心乃止越
數日三槐復自來遂羈留而以陣禽上聞勒保受上賞大烈亦賜號健勇巴圖
魯擢參將未幾擢四川提標副將充翼長善伺勒保意預諸將黜陟軍中屬目
焉五年擢川北鎮總兵勒保以罪逮魁倫代之諸將不用命賊益猖遂連渡嘉
陵江潼河大烈偕阿哈保等禦之尋復起勒保督師從勦賊於保甯別賊自開
封廟截大軍後路大烈擊却之偕阿哈保扼嘉陵江賊不得渡被獎叙夏連敗
白號賊於龍安鐵籠堡竹子山遂從勒保擊苟文明解高寺寨圍追賊循嘉陵
江至石板坨德楞泰躡其後勒保繞其前賊分遁大烈掩擊餘匪於飛龍場盡
殲之九月敗賊下八廟進扼倒流水會賽冲阿溫春兵至夾擊大破之殲湯思
舉冬偕阿哈保破楊開第於渠縣安仁追奔百餘里至巴州兩臺山禽斬二千

餘開第逸入營山柏林場亂矛斃之六年春勦楊步青於大甯金竹坪乘雪進擊連敗之白馬廟大蓋頂樊人傑徐萬富屯儀隴碑寺寨偕阿哈保夜襲之殲萬富賊奔川東追及之人傑跳崖遁散竄老林大烈進勦楊開第張漢潮餘黨拔九杆寨追擊於沙箕灣禽賊目李尊賢藍號曹世倫竄南江九嶺子偕田朝貴合擊殲之夏青藍兩號賊竄東鄉犯仁和永興二寨師分三路入大烈由右蹙之華尖壩河濱殲苟文通鮮倅先又擊賊巴州石叟山遣兵伏龍鳳埡自與阿哈保奮擊禽賊渠徐天爵王登高等詔獎賚授其子千總白號高見奇魏學盛合竄棧道大烈要之於大茅坪山半偕阿哈保夾擊勒保督諸將自山頂下壓賊大潰見奇竄空山壩與冉學勝合屯南江盧家灣乘不備擊之禽學勝予雲騎尉世職冬敗白號賊於於達州盧祠寺又追敗之開縣禽黎朝順賊竄西鄉漁渡壩大烈裹糧追躡由陝入川敗之於通江羅村復偕羅聲皋等尾擊之師次八臺山別賊圍趙家寨岫掩擊敗之又殲黃號餘賊於太平邀仙厓乘勝破八卦山殲賊渠李顯林七年搜勦老林連敗苟文明於雙河口圓嶺山禽其

黨姚青雲額勒登保檄回勦川賊大烈乞病解職回籍九年病痊命在乾清門行走扈從墜馬遣蒙古醫療治給頭等侍衛歲俸尋授天津鎮總兵擢直隸提督賞黃馬褂十一年從德楞泰赴甯陝勦撫叛兵調固原提督明年偕楊遇春平瓦石坪之亂予優叙調江南復調直隸坐爲子娶所屬守備女降天津鎮總兵尋授廣東提督復坐動用馬乾銀再降漢中鎮總兵調河北鎮二十年以隹工出力加提督銜卒於官錄前勞依提督例賜卹諡褒恪羅聲皋四川雙流入由行伍授把總從孫士毅赴湖北勦匪克旗鼓寨芭葉山擢守備嘉慶三年勦保調回四川四年從額勒登保破徐天德冷天祿累擢游擊五年授提標中軍參將破冉天士於南江長池壩賜花翎六年偕薛大烈殲曹世倫追湯思蛟劉朝選入楚敗之於竹山柳林店青藍號賊擾東鄉偕大烈敗之又偕擊賊石堡山徐天壽就禽賜號濟特庫勒特依巴圖魯遂合擊高見奇禽冉學勝冬偕張績禽蕭焜於太平黃號餘賊屯茨竹溝聲皋自花角園進攻大軍繼之禽葛士寬等七年遷督標中軍副將充翼長張簡與湯思蛟合擾東鄉敗之於老生園

楊家壩借田朝貴兵合擊蹙之河濱賊爭赴水禽思蛟弟思武追禽汪貴於太平梧桐坪度向瑤竄東鄉鳳皇山借達思呼勒岱合圍殲其衆禽向瑤川匪漸清楚匪被勦急多竄川境借達思呼勒岱合擊殲賴飛龍於雲陽閭王碛又借羅思舉追賊巴州分兩路遁思舉禽簡聲皋獲思蛟於東鄉村店八年搜勦餘匪禽青號張朝隴李明學軍事大定赴遼州辦理凱撤兵勇事宜十三年從勒保勦馬邊涼山夷匪克曲曲烏夷寨擢重慶鎮總兵調松潘鎮二十年勦中瞻對叛番克洽龍溝番酋洛布七力守險未大創乞降受之以專擅褫職戍伊犁逾三年赦歸卒於家薛陞貴州畢節人以鄉勇勦狝苗授把總嘉慶三年從勒保赴四川軍借羅思舉攻安樂坪攀援絕壁入賊營斬馘多進攻祖師觀夜伏手把巖下拔柵而登又從薛大烈設伏破撲營賊常爲軍鋒擢守備四年殲匪文玉包正洪陞皆從戰有功賜花翎五年兜勦川東竄匪陞率兵分駐黃草壩尋擊賊八石坪追至東鄉南壩場敗之軍駐蘆花嶺賊夜撲營先伏兵山洞伺擊賊大潰擢都司借桂涵破猴兒巖賊巢禽唐大魁六年從薛大烈擊賊巴州

石塽山分路要截多有斬獲禽徐天壽於王家坪擢游擊七年從勒保殲張天倫遂從田朝貴防川陝邊界禽徐天培於徐羅壩殲楊呂清於白巖峒八年入山搜捕擊走苟朝九股匪於八百谿擢雲南新營營參將軍事蒞赴本官歷東川尋需參將十八年調勦滑縣教匪攻克南門擢副將尋回雲南二十三年從勦臨安夷匪授永昌協副將道光元年勦大姚夷匪擢鶴麗鎮總兵歷陝西河州鎮直隸大名鎮擢直隸提督調湖南十六年新甯縣生藍正樽習教拒捕犯武岡城鎮羣兵滋事戕官事皆旋定吏議醵級留任陞年已七十總督林則徐疏論其老於軍事而無振作未幾以楊芳代之調陞廣西提督二十二年英吉利犯廣東赴潯梧治防因病乞假歸尋休致以舊勞予食全俸咸豐元年卒諡勤勇

論曰額勒登保以楊遇春穆克登布爲翼長德楞泰以賽沖阿馬瑜爲翼長勒保以薛大烈羅聲皋爲翼長觀偏裨之人材其成功可知矣是諸人者其後多膺軍寄一楊而外亦無赫赫功豈非材器有所限哉勒保部將差弱蓋賴羅思

舉桂涵等鄉勇之力爲多焉

清史稿

列傳一百三十六

王文雄

朱射斗

穆克登布

富成

施
籍
宋李
延紹
清

袁國璜
總何
允
節
保
神
興
高
三
德

王多
宏開
實漢
扎
布
王
蘭

倫
及
什
哈
達
任
和
員
國
康
發
制
毒
所
有
處
方

王文雄字叔師貴州玉屏人由行伍從征緬甸金川擢至游擊洊升直隸通州協副將嘉慶元年調勦襄陽教匪從慶成戰劉家集梁家岡張家營賜號法佛禮巴圖魯秋賊團鍾祥進擊破之擢南陽鎮總兵冬賊分竄河南命率兵二千回境防禦二年春敗賊禹山又敗之鄭家河追勦至裕州四里店值他軍與賊戰夾擊敗之夏息縣姦民張雲路倡亂馳勦即平秋仍赴襄陽時姚之富等逼南漳文雄駐軍五盤山扼其衝擊賊於白虎頭峽口聞賊竄陸坪分兵擊之追至羊角山斬其渠賊乃以數百人綴官軍潛趨南漳城文雄伏兵百步梯火之

賊多降，屈死遂赴陝西河南界禦賊。且防興安江岸。三年春，高均德自甯羌渡漢，齊王氏姚之富乘官軍往勦，偕李全自西鄉洋縣分道踵渡，掠郿縣，蹙屋西安。戒嚴，文雄馳援，敗賊焦家嶺，追至屹子村，猝遇賊萬餘，文雄兵不滿二千，張兩翼待賊，亦分左右來犯，爲火器擊退，復分四路至，又敗之。遂悉馬步圍官軍，數重。文雄爲圓陣，外向賊，以千餘騎猛撲，令藤牌兵大呼躍出，賊馬驚返，奔追殺數千人，斃其黨王士奇。自是賊不敢北犯。省城獲安。詔以文雄當數倍之賊，五戰所殺過當，深嘉之，立擢固原提督，追敗賊於尹家冲，其分竄翔峪、澄峪者，盡殲焉。夏，敗高均德於盤屋，又敗阮正通於南鄭。秋，張漢潮由南鄭東南竄，文雄冒雨疾馳，兩晝夜追及於廉水，塙賊踞山以礮仰擊之，乃分馬步隊潛來鈔截三路，迎擊斃賊千餘，正通竄西鄉。西流河而設伏於銅廠山，梁文雄分兵破其伏，自攻中堅禽張金等。四年，命與恒瑞分領總督宜縣所部兵專勦陝境竄匪。秋，敗苟文明於倒水洞，連敗冉天元於沙田壩。景山坪皮貨鋪川賊龍紹周竄赫池壩，欲應天元扼之。貫子山別賊冒齊家營者來犯，悉殲之。黃號伍義蘭

藍號曾六兒踞老鷹崖分兵進擊禽其黨李智花等餘賊遁入川冬樊人傑唐大信竄西鄉文雄積勞嘔血力疾督戰溫詔慰勞尋黃號諸賊復自川入陝令游擊梁渙擊之遇伏幾殆馳救解其圍疾復作而賊之匿老林者潛出犯南鄭沔縣略陽欲渡嘉陵江詔斥疏防當治罪以病原之五年夏敗楊開甲於土門關唐大信踞西鄉節草壩大祥壩夜襲克之龍紹周與大信合敗之魏家寨又連敗之黑山萬曲灣大石埡山王廟賊遁入川未幾高天德馬學禮及戴家營賊竄西鄉堰口窺縣城迎擊敗之偵賊衆潛屯法寶山夜偕副將鮑貴等分三路進賊擲石以拒文雄督衆仰攻突有騎賊從溝中出截其後山上賊出間道撲鮑貴隊急趨救賊乘勢悉衆下山鏖戰至午圍益急文雄被創十餘猶力戰左臂斷墜馬伏地北向呼曰不能仰報君恩矣遂卒仁宗震悼封三等子爵祀昭忠祠諡壯節諭慰其母賜銀千兩逾年獲戕文雄之賊馬應祥命傳首就其家致祭子開雲襲子爵官至山東鹽運使

朱射斗字文光貴州貴筑人幼讀書入伍從征緬甸金川功多累擢至都司果

殺善戰爲將軍阿桂所激賞洊升貴州平遠協副將乾隆五十年擢湖南鎮總兵調雲南普洱鎮民苗雜處綏撫得宜邊氓翕服從征廓爾喀歷福建福甯鎮四川北鎮苗疆事起率本鎮兵赴勦迭克險隘平隴之戰潛師襲後山貫魚坡賊乃潰偕額勒登保攻石隆寨伏溝下竊入斷其要路賊來爭奮擊盡殲遂斬賊魁石柳鄧賜號幹勇巴圖魯嘉慶二年春凱撤回川北王三槐踞金嶺寺合攻克之連破王家寨茨菇梁富成寨要擊於黃家山三槐中槍墜馬跳免合攻重石子香爐坪賊巢擊秋波梁竄匪殲之偕總兵百祥攻羅其清冉文儒於方山坪敗走巴州射斗駐保甯詔以本鎮轄地責嚴守三槐撲天華山營力戰卻之又合徐天德分撲風門鋪角山茶店馳擊賊遁走三年其清竄儀隴雙路場偕穆克登布追勦斬七百餘級其清等踞大鵬寨諸軍合攻射斗與恒瑞當其北賊冒雨突營出其後夾擊賊竄伏深溝悉禽之及賊由青觀山逸山追至方山坪奮擊大潰其清旋就禽四年春從德楞泰破賊麻壩寨獲文儒旣而蕭占國張長庚竄營山額勒登保迎擊黃土坪令射斗扼其西占國長庚就

殲夏包正洪潛匿隣水連敗之唐家坪趙家場追至開縣九龍山痛殲之窮追及毛坪賊踞山以火槍仰擊斃正洪子騎都尉世職秋破卜三聘於八石坪又截擊高天德馬學禮禽其黨潘受榮五年春張世龍竄南江迭敗之竹壩草廟會額勒登保德楞泰先後赴陝冉天元糾羣賊乘虛入川總督魁倫初任軍事諸將中惟射斗忠勇可恃所部兵僅二千至達州賊已渡嘉陵江乃自順慶渡河迎擊於西充文井場殲賊後隊乘勝至蓬溪高院場賊踞山下撲衆數倍官軍遂被圍魁倫初約自率兵繼進而不至射斗力戰隊伍衝斷手刃十餘人遇坎墜馬歿於陣仁宗悼惜管二等輕車都尉世職依提督例賜卹卹餘勇烈入祀昭忠祠後獲賊李自剛戕射斗者詔磔之設射斗靈致祭復傳首祭奠射斗從軍三十四年受高宗知仁宗尤以宿將重之額勒登保入川數大捷皆倚射斗及楊遇春如左右手賊畏之號曰朱虎在軍得士心尤恤難民前後拯濟不下萬人歿後兵民胥流涕賊旣退收遺骸遺左足川民於戰處得之瘞於瀘川鳳皇山仙人掌建祠以祀子樹襲世職授戶部主事道光中累官漕運總督休致

歸咸豐中命治本籍圖練捐輸事宜同治初卒

穆克登布鈕祜祿氏滿州正紅旗人將軍成德子乾隆中成德駐西藏入覲高宗詢知穆克登布曾從征金川授藍翎侍衛累擢直隸提標游擊嘉慶元年從勦湖北教匪以功賞花翎遷山東參將遂轉戰川陝四年春從惠齡克麻城寨加總兵銜擢貴州清江協副將從額勒登保殲閩中賊蕭占國張長庚乘勝進勦冷天祿於岳池令穆克登布先據人頭堰與楊遇春夾擊大破賊衆殲天祿賜號濟特庫勒特依巴圖魯於是額勒登保軍威大振遂任經略穆克登布與楊遇春爲左右翼長常爲軍鋒冬與七十五夾擊樊人傑於通江敗之擢山西太原鎮總兵時川賊徐天德王登廷冉天元合撓官軍阻饒道額勒登保以賊皆勁悍集師合擊於蒼溪貓兒壩議與穆克登布楊遇春分三路進攻穆克登布恃勇先期往爲賊所乘腹背受敵傷亡副將以下二十四人士卒數百及遇春至據險與賊相持經略中軍亦被攻血戰竟夜黎明賊始卻登廷旋就禽偕遇春追天元至開縣與德楞泰會師夾擊賊勢乃蹙五年從經略入陝夏與楊

遇春合擊伍金柱於手扳厓銅錢窖追殲楊開甲於茅坪秋要擊張天倫於兩
當剪子巖追殺數十里賊折奔階州遇於佛堂寺擊敗之斬其渠曾印六年春
冉學勝將入陝雪夜率勁騎衝之賊潰又敗伍懷志於五郎江口擢乾清門侍
衛夏伍懷志糾黨由漢北東竄分兵晝夜窮追及之於秦嶺禽懷志餘黨盡殲
子雲騎尉世職七年調湖南永州鎮撫甘肅提督馳勦川東湖北竄匪破王國
賢於平利追入川迭敗賊於青岡坪太平坡禽景英是年軍事將蒞錄諸將功
擢御前侍衛晉騎都尉世職八年春搜捕餘匪由巴峪關深入禽宋應伏又禽
姚馨佐等於南江應伏最悍馨佐乃之富子皆賊之著名者應伏黨尙存馮天
保余佐斌熊老八並百戰猾賊熊老八年二十餘死黨百餘皆壯悍矯捷所用
矛長數丈山沒老林傷將士甚衆至是誘官軍入林設伏狙伺穆克登布下急
輕敵勁卒又爲他將分調倉猝中矛歿於陣加子輕車都尉世職併爲二等男
爵諡剛烈嚴詔捕熊老八期必獲武弁陳弼賄降俘取賊屍僞冒以獻立擢弼
參將傳首祭穆克登布墓逾年羅思舉始捕得老八磔之軍中不敢上聞子頤

齡襲爵二等侍衛孝全成皇后之父也道光十四年冊立皇后禮成追封一等承恩侯擢入鑲黃旗諡榮禧以孫瑚圖哩兼襲兩爵三十年文宗即位晉封三等承恩公以長子文壽襲次子文瑞襲男爵

富成石莫勒氏滿洲鑲黃旗人起健銳營前鋒從征烏什大小金川積勞至參領歷火器營營總出爲廣西直隸副將擢山西太原鎮總兵坐失察盜馬賊入邊降京營游擊復擢山東兗州鎮總兵嘉慶元年教匪起率本鎮兵赴河南協剿先清鄧州賊巢進剿呂堰驛隨州紅土山黃玉書就禽叙功以提督升用又連敗賊於鍾祥鄧家岡香花園南線畝命兼領直隸吉林新調兵二年進攻梁家集總統惠齡與賊戰槐樹岡富成聞礮聲馳往夾擊大敗之偕慶成合擊劉起榮又敗賊於溫峽口襄匪由河南竄入陝境總督宜綏疏調富成赴西安率甘肅兵二千回兵二千助剿夏分兵五路圍賊於大涼山下殲賊千餘禽其巢李天德等又連敗賊於雙河口青莊坪放牛坡大石川擢江南提督赴漢中甯羌扼川賊入竄之路循漢南而西與明亮夾攻賊距江近佯引兵入山圖潛渡

富成繞出賊後兜擊之斬獲甚衆被獎賚三年春赴達州擊退犯城賊通新甯運道又連敗賊於寶山關木竹坪白山寺擡成都將軍命勦徐天德屢詔責戰甚急冬戰清涼寺殲賊數百四年張映祥竄廣元甯羌擊之毛家山又與恒瑞夾擊於略陽階州經略勒保疏言其兵力不足未能制賊褫職逮問會富成連敗賊於黃家坪大水溝黨家坪蔣家坪詔免治罪以披甲留營効力駐鎮安防勦五年夏總督長麟追勦冉學勝伍金柱等而高天德馬學禮亦來犯富成馳援徽縣賊襲長麟營官軍敗績於架子山富成力戰被重創遂歿於陣上初以勦張映祥久無功故加重譴至是惜之命入祀昭忠祠予雲騎尉世職子三等侍衛普亮襲時軍事久不定兵多或事剽掠鄉勇尤甚人目爲紅蓮教富成與總兵穆維馭下較嚴爲時所稱云維直隸清苑人隸督標乾隆中山東王倫倡亂以陣斬賊渠楊壘功擢千總賊聞京兵南下掠糧艘造浮橋圖西竄維直搏獲賊砲二焚其橋賜號奮勇巴圖魯累擢膠州協副將嘉慶元年偕富成赴襲陽恒瑞攻劉家集維率騎兵橫貫賊營大軍蹙其後獲大捷師次滾河賊屯對

岸董家岡梁家均維借王文雄選精兵夜潛渡破賊營二年擢登州鎮總兵冬高均德王廷詔分擾班鳩關窺渡漢江借副都統六十七連敗之雙河塘土門被優獎三年春赴四川從勒保敗王三槐徐天德於石壩山借富成要賊竹峪關洪口諸隘又敗冉文儒於黑馬山夏賊出李家山西逸要之大完山以砲俯擊賊退他將乘勢追擊維直搗李華寺破賊巢勞甚致疾卒於軍詔視陣亡例賜卹

施縉陝西定邊人由行伍從征緬甸累擢雲貴督標都司苗疆事起應調隨征屢有功賜號毅勇巴圖魯累擢湖南參將嘉慶二年從總督勒保勦貴州狝苗三月連克關嶺巴隴諸要隘進逼永甯克下山塘賊寨解新城圍五月與總兵張玉龍分兩翼進克望城坡碧峯山賊寨攻羊腸山追賊至新店禽其渠梁阿站等擢副將六月從勒保攻克水煙坪偕按察使常明設伏八角洞坡進攻阿捧毀寨十一大軍進卡子河縉分克納賴坡雞灣寨攻普坪渡河解南籠圍進攻九頭山禽賊渠陸寶貴焚其巢克馬鞭田山寨七月破韋七綸寨於普磨禽

其罕聞阿召山梁李景寨設伏破援賊擢臨元鎮總兵偕常明攻安有大寨率勇士攀藤上克之禽賊渠賀阿豆吳阿降九月從勒保洞克瀧賊巢禽首逆章七絳鬚十一月搜勦上下羅障直達關嶺前後克寨二十調貴州安義鎮十二月偕總兵七格等搜勦各路乘勝擊壩郁嶧嶺諸寨自捧鮮至黃草壩賊皆淨盡松林紅巖石門坎香爐箬諸苗尙負固抗拒要擊破之焚寨十九特詔嘉獎予優叙三年復從總督鄂輝進勦兩薛巖師趙屯諸苗克寨五十苗境遂平五年春四川教匪復熾起用勒保會貴州巡撫常明薦繙率貴州兵往協勦仁宗知繙勦种苗奮勇冠軍爲勒保舊部兵將相習命所領自爲一軍又慮地利賊情未悉聽德楞額秦節制三月至潼川連破賊於大雙墩潼河岸四月高天德馬學禮由甘肅竄農安從勒保迎擊盤龍驛漩河口敗之偕阿哈保迎擊於黃連壩白號藍號衆賊竄合江口奪渡嘉陵江偕阿哈保分四路進擊大敗之詔以嘉陵江西肅清貴州兵新到屢捷特予褒叙時高馬二賊欲與藍白諸號合屯竹子山勒保以龍安西北兩面俱通番地議分三路兜勦自率一軍出東北一

軍出西北而以縉軍由南進甫抵山南賊乘高下壓縉揮軍迎擊奮力急戰賊來益衆猝受矛傷殞於陣縉最爲勑保所倚至川以不習地勢致敗優詔依提督例賜卹稱爲驍將予騎都尉兼雲騎尉世職子登襲騎都尉占科襲雲騎尉李紹祖順天大興人以武進士授三等侍衛出爲山東武定營游擊累遷臨清協副將嘉慶元年赴襄陽數擊賊有功賞花翎二年從恒瑞赴四川迭敗賊於田家壩大甯山梁金子梁三年擢甘肅巴里坤總兵秋合攻打石城插旗山古戰坪皆捷冬從惠齡克馬鞍山賊巢四年夏從德楞泰擊賊於王家壩川壩子秋偕七十五破樊人傑於開縣又敗之臨江市五年春冉天元等渡嘉陵江總督魁倫調七十五往援會其病以兵付紹祖率赴川西進擊鹽亭南部德楞泰擊賊於江油白家壩檄紹祖馳赴賊踞替林口宵犯紹祖營擊卻之賊譟詭稱難民詣營獻計誘官軍往德楞泰知其詐率紹祖掩擊之大捷追敗之於包家溝進戰火石壩以功被優叙詔以川西略定命紹祖率貴州兵赴陝額勒登保疏請仍留川遂從德楞泰擊張子聰於中江黃鹿山朱家坪禽斬甚衆調四川

松潘鎮旋調廣東高廉鎮仍留軍夏收張子聰度向瑤於達州土主河又擊劉朝選於七孔溪山大破之追餘匪至大竹遇苟文明屢夜來撲營擊却之八月徐萬富竄房縣追敗之兩河口賊竄木瓜鋪偪近遠安縣城紹祖扼之牛鹿坡賊分二隊一犯縣城一薄紹祖營紹祖力拒賊佯敗走匹馬追之遇伏被害依提督例賜卹贈果壯子騎都尉兼雲騎尉世職子霖襲宋延清山東招遠人乾隆四十六年武進士授藍翎侍衛出爲貴州都司遷游擊從征苗疆迭克峒寨從額勒登保攻鴨保山率健卒奪賊卡夜大風攀崖縱火克之賜號驍勇巴圖魯擢參將狎苗之役勒保調回貴州率兵爲左翼克關嶺碧峰山諸隘破洞瀧當丈賊巢論功居最擢大定協副將嘉慶三年從勒保赴四川擊賊董谿口大元山皆力戰斬敵多乘勝追賊至楊家壩中槍歿於陣延清驍勇出衆勒保常置左右勦狎苗時每戰歸持刀負首級紫纓衣盡赤勒保輒手酌酒慰勞至川未逾月即戰歿深惜之加等賜卹予騎都尉世職

袁國璜四川成都人山行伍從征金川屢克堅碉擢守備復草布什咱全境及

達爾圖功皆最洊升游擊金川平摺江南狼山鎮總兵五十三年從征臺灣克
大埔尾斗六門水沙連大里找賜號博齊巴圖魯及林爽文竄匿東勢角山徑
深隘徒步搜捕生禽於老衝崎被優叙病歸起署四川建昌鎮尋授重慶鎮總
兵從征廓爾喀克象巴宗山甲爾古拉卡囊灣廓爾喀兩次論功再圖像紫光
閣六十年從總督孫士毅由川境進勦苗疆數有功被褒賞嘉慶元年四川教
匪蜂起蔓延數縣川兵多赴苗疆署總督英善倉猝偕副都統勒禮善佛住馳
往兵僅數千檄國瑋及總兵何元卿進勦達州賊屯天星橋國瑋奮擊斬戮千
餘賊竄橫山子偕元卿焚其卡奪據山梁賊自東鄉糾黨數千來犯礮擊之退
次日復衆迎擊斃賊數百而來者愈衆國瑋苦戰三日力竭陣亡依提督例賜
卹予騎都尉兼雲騎尉世職子起襲何元卿四川華陽人從征金川廓爾喀苗
疆積勞擢副將嘉慶元年從福甯克旗鼓寨擢陝西興漢鎮總兵達州橫山子
之戰與國瑋同遇害子騎都尉兼雲騎尉世職孫勝先襲官至湖南沅州協副
將諸神保馬佳氏滿洲正紅旗人起護軍校出爲四川游擊駐西藏累擢重慶

鎮總兵廓爾喀之役守絨轄要隘賞花翎調建昌鎮從征苗疆嘉慶元年赴湖北勦教匪從福甯破賊來鳳克旗鼓寨賜號喀勒春巴圖魯二年從額勒登保圍攻芭葉山賊夜突營由諸神保汛地逸出坐視職留營自贖尋擊賊紅土溪被創墜馬陣亡依參將例賜卹予雲騎尉世職達三泰原名達音泰呢瑪奇氏滿洲鑲黃旗人由烏槍藍翎長累遷副護軍參領從征石峯堡陝西循化營參將歷甘肅永固協副將署西甯鎮從征廓爾喀有功賜號常勇巴圖魯授四川松潘鎮總兵乾隆六十年湖南苗犯酉陽率屯土兵擊之克砲木山石花諸寨偕提督花連布進解永綏圍又偕阿哈保塞靈額攻納共山攀縋而上斬獲甚衆克貴道嶺馬鞍山追賊黃土坡被創力戰大捷特賜蟒服又破貫魚坡苗疆平嘉慶二年移軍湖北勦教匪遂赴四川齊王氏姚之富趨達州欲與王三槐等合達三泰先據白帝城連戰却之進援巫山巴東要擊之小河口又追敗之均州竹溪賊復由陝入川與明亮合擊於黃壩驛三年從大軍逼賊三岔河齊王二賊就殲被優賚尋擊高均德於山陽合圍大神山設伏誘賊敗之略靜

邊寺禽斬甚衆會諸軍克箕山擢甘肅提督勒保調赴川東助勦冷天祿攻手把巖奪魚鱗口賊卡遇伏被害卹設壯節予騎都尉兼雲騎尉世職子呢瑪善襲呢瑪善從父軍中以戰功授藍翎侍衛父歿轉戰三省累擢頭等侍衛授河北鎮總兵歷鄧衡州南陽諸鎮道光初擢成都將軍平果洛克番匪卒設勦襲德齡納喇氏滿洲銀白旗人由拜唐阿累擢鑾輿衛冠軍軍使出爲直隸副將擢山西太原鎮總兵調赴襄陽勦教匪從慶成等轉戰以功賜花翎嘉慶二年駐防夔州三年偕觀成合攻老木園賊旣殲勦鐵瓦寺餘匪四年秋擊張金魁於岳池場安家山敗之追至萬縣陳家坡後隊爲賊所襲馳馬回戰歿於陣子騎都尉世職保興承吉氏滿洲銀白旗人烏槍護軍隊長從征緬甸金川累遷參領出爲陝西神木協副將丁憂回旗甘肅撤拉爾回叛起署河州協兵事初定撫綏有法軍民安之調督標中軍擢直隸宣化鎮總兵歷陝西興漢鎮甘肅河州鎮嘉慶二年赴川陝勦教匪偕朱射斗擊賊營山又敗之小埡口王三槐擾大竹廣安要擊之隣水被圍知縣楊爲龍堅守馳援賊始退被優資偕朱射

斗破賊天華山乘勝連奪要隘三年攻彈子壩殲賊渠時王三槐犯開縣繼其
清冉文儔合蹙東鄉後河將窺陝保興繞出賊前與楊秀夾擊敗賊於固軍壩
賞花翎賊自陝回擾達州保興要擊於龍鳳垭又戰石梯坎徑路紛歧會大風
雨賊壓而陣遂遇害予騎都尉世職河州民爲立祠凝德烏雅氏滿洲正黃旗
人尙書官保子授藍翎侍衛歷變與衛治儀正冠軍使出爲直隸獨石口副將
調督標中軍嘉慶元年赴湖北軍從破黃玉貴於紅土山賞花翎二年赴孤山
冲防勦尋入川王三槐擾渠縣扼守紅春壩四年擢甘肅巴里坤總兵從恒瑞
勦賊甘肅駐守三曹河賊北走追敗之老柏樹牟家壩兩河口五年辛聰餘黨
竄秦安訛言伏羌被圍凝德率兵四百赴援未至四十里遇賊衆寡不敵拒戰
被害予騎都尉世職多爾濟扎布巴魯特氏蒙古鑲黃旗人由藍翎侍衛累擢
湖北鄖陽參將從勦鎮筸苗遷副將嘉慶元年檄防竹山竹谿三年署宜昌鎮
總兵從擊張漢潮於山中躡蹤窮追被嘉獎五年授廣東碣石鎮總兵二月勦
陝匪於洵陽三岔山乘勝深入賊分隊繞襲後路四面受敵揮軍殺賊百餘日

募力盡被害予騎都尉世職王凱貴州貴筑人從征金川積勞至游擊累擢浙江定海鎮總兵嘉慶二年以不諳水師降副將命赴貴州從勒保勦狝苗補都勻協三年授宜昌鎮總兵駐守鄖縣敗賊於黃龍灘率兵二千分守鄖西巴州防張漢潮四年賊竄房縣擊走之五年復來犯大敗其衆又破賊於東湖夏徐天德窺襄鄖兵單犯當陽遠安踞馬鞍山合諸軍環攻凱傍左麓進賊走馬家營師分三路入賊張左右翼拒戰別遣步隊鈔截後路凱奮擊賊稍却兵進遇伏賊自林中出猝被害優卹諡壯勇予騎都尉世職王懋賞山東福山人乾隆四十一年一甲一名武進士授頭等侍衛出爲雲南景蒙營游擊累遷廣西潯州協副將從征苗疆克結石岡破尖雲山復乾州皆有功嘉慶二年以勦西隆匪回廣西五年調赴湖北軍六年敗賊余家河茅倫山賞花翎攻鵝坪坡寨家坪擢湖南永州鎮總兵駐守興州房縣大竹防川陝竄賊七年曾家秀等竄保康倍道窮追賊踞馬鬣嶺拒戰懋賞先登中矛歿於陣予騎都尉世職

惠倫富察氏滿洲鎮黃旗人一等承恩公奎林子出嗣伯父一等誠嘉毅勇公

明瑞襲爵擢頭等侍衛尙茶正鑲藍旗護軍統領授奉宸苑卿嘉慶二年命偕副都統阿哈保率東三省兵赴湖北勦教匪時賊氛方熾詔惠倫迅往襄陽如明亮德楞泰猶在賊後即會同王文雄攻勦聽景安調度惠倫至襄陽擊賊小河口偕阿哈保追殺二十餘里大兵適自荊州至乘機夾擊賊大敗竄入南漳山中優詔獎賚又偕德楞泰擊賊耗子溝賊衆猛撲達三泰連射賊惠倫揮軍突進衝入賊陣會明亮自楓樹埡夾攻斬獲甚多賊竄花石嶺總兵長春誘之下山達三泰設伏山半惠倫以勁騎橫擊賊敗竄黃龍灘欲分走鄖陽斗河無船可渡追及草甸賊五路迎拒官軍亦分五隊明亮等據山梁賊上撲擊敗之別賊突出援惠倫等又敗之乃奔陳家山聚乘霧圍遁惠倫渡澗追擊見一賊執旗指揮知爲渠魁追至長坪射之應弦倒餘賊競集連射斃數賊猝中槍歿於陣高宗震悼詔惠倫父子效命疆場實爲可憫從優議卹賜內帑三千兩治喪以子博啟圖襲公爵在御前侍衛行走博啟圖自有傳安祿多拉爾氏滿洲鑲黃旗人一等超勇公海蘭察子以海蘭察平石峯堡功推恩授二等侍衛乾

清門行走並予騎都尉世職從征廓爾喀賜號哈什巴巴圖魯五十八年承襲公爾擢頭等待衛嘉慶四年命解饑赴四川遂從額勒登保軍時徐天德敗竄雞公梁額勒登保乘夜追之黎明賊復拒戰安祿偕格布舍以左翼衝賊陣賊竄城隍廟右翼楊遇春伏起前後夾擊殲戮無算又敗王登廷追至西鄉魚渡壩王登明與齊家營股匪合踞青岡嶺安祿等三路競進賊大潰鮮大川苟文明窺開縣偕朱射斗敗之於枯草坡乘霧奪汪家山餘賊數千奔下山清安祿率五六騎大呼馳擊賊衆披靡突林中數矛攢刺遂歿於陣事聞優卹賜內帑一千兩諡壯毅加予騎都尉世職仁宗深惜之詔以惠倫安祿皆名將子膺五等之封爲募民所戕國威大損戒統兵大臣以滿洲東三省兵自爲一隊及鋒而用勿致疏虞子恩特賀莫札拉芬襲公爵兼騎都尉尋議又加騎都尉併爲三等輕車都尉以安祿弟安成襲佛佳瓜爾佳氏滿洲正白旗人侍郎三泰子三泰殉難葉爾羌封三等伯佛佳襲爵爲散秩大臣世管佐領充阿克蘇領隊大臣授成都副都統嘉慶元年充哈密辦事大臣行抵西安聞達州教匪起自

請偕英善往勦尤之時賊撲東山廟與豐城賊合佛住與副都統勒禮善分路進攻冒雪山路破賊卡扼東山隘口賊自大東林潛渡河率協領塔克慎知縣劉清隔岸砲擊之又偕英善勒禮善禽徐天富被優賚二年正月豐城賊傾巢出游擊范楨守備楊成陣亡賊遂逼東鄉別賊復自張家觀來犯佛住率衆力戰歿於陣詔佛住已調哈密自請回川勦賊今在東鄉捐軀其父三泰亦係陣亡尤爲可憫從優議卹應給世職併爲一等子爵加一雲騎尉子瑞齡襲西津泰和色里氏滿洲鑲黃旗人前鋒侍衛從征臺灣累戰皆捷賜號法爾沙台巴圖魯圖像紫光閣擢護軍參領從征苗疆克榔木陀山大坪山雷公灘木烏草河圍高多寨復連破賊於大坡腦得勝山克垂藤董羅諸寨焚大小天星寨進克馬鞍山擢頭等侍衛加副都統銜從額勒登保克石隆賊巢石柳鄧就殲予優叙嘉慶二年赴四川破王三槐於丹家壩金義寺從宜縣擊賊於花潭子又克香鋪坪賊巢迭被優賚進擊安子坪賊退精忠寺圍之傾巢出犯西津泰衝入賊陣手刃十餘賊身受重創陣亡予騎都尉兼雲騎尉世職豐仲布唐古

武氏蒙古鎮紅旗人福州駐防由馬甲累擢協領從征臺灣擢西安右翼副都統嘉慶元年率軍駐興安防湖北教匪二年移防商維要隘賊犯雙樹卡又間道攻縣城連卻之賞花翎進駐竹谿遇賊入陝賊掠近地屢擊走高天升大股踞石槽溝率兵千自竹山進勦關廟河要隘也冒雨進扼之賊來爭豐伸布先據山梁賊分兩路猛撲殺傷相當而賊益全集短兵相接豐伸布受創甚至暮大雨息軍山巔以傷殞優卹設壯勇予騎都尉兼雲騎尉世職六年高天升就禽傳首祭墓無子以姪阿克當阿襲職阿爾薩朗賴奇武氏蒙古鎮白旗人以副前鋒參領從征金川迭克山寨堅礮破札古功尤著戰達撒谷受創特詔慰問累擢正紅旗蒙古副都統賜號阿爾杭巴圖魯金川平圖像紫光閣歷喀什噶爾伊犁領隊大臣召回京會甘肅石峯堡回叛自請從勦連破賊於雲霧山田家山進圍石峯堡攻其西北以火攻克之斬虜特多授護軍統領調正藍旗滿洲副都統嘉慶元年率健銳火器營從永保勦教匪轉戰河南湖北屢破賊二年五月駐兵王家坪營壘未定賊自山溝出襲阿爾薩朗力戰猝中槍歿於

陣賜卹予騎都尉世職及高天升傳首京師命祭其墓烏什哈達伊爾根覺羅氏滿洲正黃旗人以前鋒從征緬甸有功賜號法福哩巴圖魯授三等侍衛從征金川屢克堅碉擢二等侍衛正白旗蒙古副都統予騎都尉加一雲騎尉世職充和闐領隊大臣坐與辦事大臣德鳳互訐視職効力烏什邊卡尋復起授頭等侍衛虎槍營營長健銳營翼長從征臺灣率水師禽賊渠莊大田於椰嶼復勇號世職授吉林副都統調鑲紅旗蒙古副都統從征廓爾喀烏什哈達臨陣勇敢論功輒最三次圖像紫光閣召對自伐戰績高宗惡之褫職戍伊犁嘉慶元年赦歸請赴湖北軍勦匪自效偕副都統鄂輝敗賊襄陽進戰鍾祥二年駐守宜城西岸賊窺古河口擊走之移防四川石砭攻白巖山克賊卡三年王三槐由梁山墊江竄渠口與白巖山賊潛結引之渡江烏什哈達兵少不敵力戰遇害子輕車都尉世職子圖爾弼善襲和興額葛濟勒氏滿洲鑲白旗人以烏槍護軍從征緬甸金川撒拉爾石峯堡賜號佛爾欽巴圖魯累擢廣州右翼副都統坐事降調授頭等侍衛充巴里坤領隊大臣復授廣州左翼副都統嘉

慶二年狝苗擾及廣西西隆從總督吉慶赴勦收賊於曼雄苗屯亞稿設伏山徑山深箐繞出夾擊殲之進攻那地西隆肅清圍巖塲寨連敗之紅水江板蚌板階解冊亨圍狝苗平調甘肅涼州副都統五年赴陝西防勦冉學勝等由辛峪竄出和興額不能禦奪勇號花翎降爲防禦隨營効力尋破賊沔縣乾溝河授佐領六年樊人傑由黑河西竄和興額扼之於五丁關禽斬甚衆擢協領冉學勝屯大壩偕總兵楊奎猷擊之和興額先進遇伏歿於陣依副都統例賜卹予騎都尉兼雲騎尉世職子福格襲

論曰教匪之役首尾十年國史忠義傳所載副參以下戰歿至四百餘員其事闕提鎮及羽林宿衛階列一二品者且二十餘人王文雄朱射斗一時名將穆克登布施縉亦號驍勇惠倫安祿並貴冑秀才倉猝摧仆三軍氣燄當宁爲之震惻旌卹特示優異餘雖功過相參要皆竭忠行間隕身不顧嗚呼烈已當日巖疆悍寇軍事艱難蓋可見云

清史稿

列傳一百三十七

李長庚

字子龍 浙江嘉興人

王得祿

邱良功

廣東人

許松年

黃標

字林 福建人

李長庚字西巖福建同安人乾隆三十六年武進士授藍翎侍衛出爲浙江衢州營都司累遷樂清協副將五十二年署福建海壇鎮總兵鄰海有盜誤指所轄界坐視職密家財募鄉勇捕獲巨盜起用補海壇游擊遷銅山參將自乾隆季年安南內亂招瀕海亡命劫內洋以濟餒爲患粵東土盜鳳尾水澳兩幫附之遂益肆擾五十九年夷艇始犯福建三澎長庚擊走之嘉慶二年遷澎湖協副將擢浙江定海鎮總兵三年迭擊洋匪於衢港及普陀四年鳳尾幫引夷艇入溫州洋敗之賜花翎五年夏夷艇合水澳鳳尾百餘艘萃於浙洋逼台州巡撫阮元奏以長庚總統三鎮水師擊之會師海門賊泊松門山下相持颶風大作覆溺幾盡其泊岸及附敗舟者皆就俘獲安南僞侯倫貴利等四總兵磔之

以敕印擲還其國是年擢福建水師提督尋調浙江安南烏船船百餘號總兵
十二人分前中後三隊所獲四總兵其後隊也未幾安南新阮內附受封守約
束艇匪無所巢穴其在閩者皆爲漳盜蔡牽所并有艇百餘粵盜朱漬亦得數
十艘率同安人奸猾善用衆旣得夷艇凡水澳鳳尾諸黨悉歸之遂猖獗阮元
與長庚議夷艇高大水師戰艦不能制乃集捐十餘萬金付長庚赴閩造大艦
三十名曰霆船鑄大礮四百餘配之連敗牽等於海上軍威大振八年牽竄定
海進香普陀山長庚掩至牽僅以身免窮追至閩洋賊船糧盡帆壞僞乞降於
總督王德道興泉永道慶徠赴三沙招撫王德遠檄浙師收港牽得以其間修
船揚帆去浙師追擊於三沙及溫州毀其船六牽畏霆船賄閩商造大艇高於
霆船出洋以被劫報牽得之渡橫洋劫臺灣米以饒朱漬遂與之合九年夏連
勝八十餘入閩戕總兵胡振聲詔治閩將不援罪長庚總統兩省水師秋牽漬
共犯浙長庚合諸鎮兵擊之於定海北洋衝賊爲二自當牽急擊逐至蕞山牽
以大艇得遁委敗朱漬漬怒於是復分十年夏調福建提督牽聞長庚至遂竄

浙追敗之青龍港又敗之於台州斗米洋復調浙江提督十一年正月率合百餘艘犯寧海結土匪萬餘攻府城自號鎮海王沈舟鹿耳門阻援兵長庚至不得入諜知南汕北汕大港門可通小舟遣總兵許松年副將王得祿繞道入攻洲仔尾連敗之二月松年登洲仔尾焚其寨牽反教長庚遣兵出南汕與松年夾擊大敗之牽無去路困守北汕會風潮驟漲沈舟漂起乃奪鹿耳門逸去詔奪花翎頂戴四月蔡牽朱濟同犯福甯外洋擊敗之追至台州斗米洋禽其黨李按等長庚疏言蔡逆未能殲禽者實由兵船不得力接濟未斷絕所致臣所乘之船較各鎮爲最大及逼近牽船尙低五六尺曾與三鎮總兵願預支養廉捐造大船十五號而督臣以造船需數月之久借帑四五萬之多不肯具奏且海賊無兩年不修之船亦無一年不壞之積料桅柁折則船爲虛器風篷爛則寸步難行乃逆賊在鹿耳門竄出僅餘船三十篷朽硝缺一回閩地裝篷燂洗煥然一新糧藥充足賊何日可滅詔逮治玉德以阿林保代既至福建諸文武吏以未協勦未斷岸奸接濟懼得罪交譖長庚阿林保密劾其逗留章三上詔

密詢浙江巡撫清安泰疏言長庚熟海島形勢風雲沙線每戰自持柁老於操舟者不及兩年在軍過門不入以捐造船械傾其家資所俘獲盡以賞功士爭效死八月中戰漁山圍攻蔡逆火器瓦石雨下身受多創將士傷百四十人鏖戰不退賊中語不畏千萬兵只畏李長庚實水師諸將之冠且備陳海戰之難非兩省合力不能成功狀時同戰諸鎮亦交章言長庚實非逗留仁宗震怒切責阿林保謂朕若輕信其言豈不自失良將嗣後勦賊專倚長庚儼阿林保從中掣肘王德即前車之鑒並飭造大同安棧船三十未成以前先雇商船備勦長庚聞之益感奮是年秋擊賊於漁山受傷事聞復還翎頂十二年春擊敗牽於粵洋大星嶼十一月又擊敗於閩洋浮鷹山十二月遂偕福建提督張見陞追牽入澳窮其所向至黑水洋牽僅存三艇皆百戰之寇以死拒長庚自以火攻船挂其艇尾欲躍登忽賊中喉移時而殞時戰艦數十倍於賊見陞庸懦遙見總統船亂遽退牽乃遁入安南外洋上震悼褒卹初擬俟寇平錫以伯爵乃追封三等壯烈伯諡忠毅於原籍建專祠長庚治軍嚴信賞必罰自偏

裨下至隊長水手耳目心志如一人人皆可用與阮元同心整厲水師數建功爲王德所忌及阿林保之至閩也置酒款長庚謂曰大海捕魚何時入網海外事無左證公但斬一曾以牽首報我飛章告捷以餘賊歸善後辦理公受上賞我亦邀次功孰與窮年冒風濤億倖萬一哉長庚謝曰吾何能爲此久視海船如廬舍誓與賊同死不與同生阿林保不懌旣屢劾不得過則飛檄趣職長庚緘所落齒寄其妻志以身殉國旣歿詔部將王得祿邱良功嗣任勉以同心敵愾爲長庚雪讐二人遵其部勒卒滅蔡牽竟全功焉長庚無子養同姓子廷鉅爲嗣襲伯爵授二等侍衛道光中出爲南昌副將累擢浙江提督因病不能巡洋奪職家居咸豐初治本籍團練迭克廈門金島仙游授福建提督尋以誤報軍情解任仍會辦團練十一年卒孫經寶襲爵胡振聲亦同安人提督貴子起行伍累擢至溫州鎮總兵從長庚大破夷艇於台州松門洋自是屢從長庚擊賊海上九年六月率二十六艘連舟材赴福建至浮鷹洋遇賊與總兵孫大剛夾攻殲賊甚衆而舟爲礮焚閩師不能救遂被害優卹諡武壯子麟都尉兼雲

騎尉世職

王得祿字玉峯福建嘉義人林爽文倡亂陷縣城得祿家素豐捐資募鄉勇助官軍復之授把總明年賊復圍城從總兵柴大紀固守及圍解率鄉勇搜捕大坪頂等處餘匪焚琅嶠賊集賊渠莊大田就禽臺灣平賜花翎五品頂戴遷千總嘉慶元年巡洋至獺窟遇賊得祿先登禽吳興信等歷年出洋捕海盜號勇敢累擢金門營游擊七年從李長庚擊蔡牽於東湧洋禽賊目徐業等百餘人又禽呂送於崇武洋被獎叙九年從總兵羅仁太擊賊於虎頭山洋面獲船械甚多十年擊蔡牽於虎井洋敗之署澎湖協副將九月遇牽於水澳焚其舟禽殲朱列等百餘人十一年春牽入臺灣圍府城李長庚令得祿與許松年駕小舟自安平港入偵之帆檣彌望夜縱火焚賊舟遂入屯柴頭港明日賊自洲仔尾攻府城北門得祿率兵踞其後大呼以前賊驚却城內軍出夾攻大敗之乘勝至洲仔尾破其營賊乃遁五月牽復竄鹿耳門得祿首先衝擊獲船十沈船十一叙功加總兵銜尋擢福甯鎮總兵十二年調南澳鎮七月敗朱清於雞籠

洋獲船十四十一月又敗其黨於古雷洋射殪賊目朱金禽張祈被獎叙未幾李長庚戰歿命得祿與邱良功繼任軍事十三年擢浙江提督既而調福建邱良功代之時阮元再任浙江巡撫張師誠爲福建巡撫兩省合力得祿與良功同心滅賊十四年八月同擊蔡牽於定海漁山敗之牽東南走追至黑水洋合擊累日良功以浙舟聯列賊舟東得祿率閩舟列浙舟東戰酣良功舟傷暫退得祿舟進附牽舟諸賊黨隔不得援牽鉛丸盡以番銀代得祿額腕皆傷擲火焚牽舟尾樓復衝斷其柁牽知不免舉礮自裂其舟沈於海詔以牽肆逆十有四年渠魁就殲厥功甚偉錫封得祿二等子爵賜雙眼花翎餘黨千二百人後皆降海盜遂息得祿爲福建提督歷十載屢疏陳緝捕事宜改定水師船制皆如議行二十五年調浙江提督道光元年乞病歸十二年臺灣張丙作亂得祿率家屬禽賊目張紅頭等加太子少保十八年臺匪沈和肆掠輸糧助守晉太子太保二十一年英吉利犯廈門命駐守澎湖次年卒贈伯爵諡果毅次子朝綸襲子爵官戶部員外郎

邱良功福建同安人起行伍屢以獲盜功治擢閩安協副將嘉慶十年偕許松年會剿蔡牽追至小琉球見臺灣師船二爲賊圍赴援松年舉旗招之未至以違調遣被劾職逮訊得白復原官署臺灣副將十一年春從李長庚擊蔡牽破洲仔尾賊巢乘間逸奪頂戴五月破牽於鹿耳門賜花翎十二年朱清犯淡水偕王得祿追至雞籠洋連敗之禽殲甚衆被優叙十三年擢浙江定海鎮總兵十四年擢浙江提督偕王得祿合擊蔡牽於漁山外洋乘上風逼之夜半浪急不得進明日復要截環攻牽且戰且走傍午逾黑水洋見綠水良功恐日暮賊遁大呼突進以己舟逼牽舟兩篷相結賊以梃衝船陷入死鬪良功腓被矛傷毀賊梃得脫出閩師繼之牽遂裂舟自沈論功錫封三等男爵次於王得祿或爲之不平良功曰海疆肅清已爲快事名位軒輊何足計二十二年入覲卒於途賜卹諡剛勇子聯恩襲男爵官直隸河間協副將陳步雲浙江瑞安人入伍隸水師數獲盜以勇力稱授溫州營把總從良功追蔡牽步雲以四十人駕舟徑逼牽艦慶蘭舟小不相當見兩提督至亟投火礮焚賊艦以長戟鉤舫

率數卒躍登短兵相搏殲牽妻及其黨賊艦已壞牽猶持利刃踞舵樓顧欲取之良功隔船疾呼船與水平速去放長繩水中援之起而牽船沒矣步雲身被十數創兩提督皆臨慰視事聞賜獎武銀牌擢千總紫邏閩安副將總督孫爾準欲裁減師船步雲言李提督所造船高大堅緻其利遠勝同安夾板快駒諸船裁之緝匪無具有事不能制敵議乃寢爾準薦其才可勝專閩入覲宣宗曰汝即隨邱王兩提督攻沈蔡牽之陳步雲耶詢戰功甚悉遂擢定海鎮總兵歷瓊州福甯金門海壇諸鎮道光十九年以傷發乞解職三十年卒

許松年字蓉雋浙江瑞安人以武舉効力水師從李長庚積功至提標參將嘉慶十年護理金門鎮總兵擊蔡牽於小琉球又擊朱清烏石二於宮仔洋從李長庚追敗之於閩粵交界甲子洋又迭擊牽於青龍港斗米洋十一年偕王得祿敗牽於臺灣洲仔尾趾海水而登焚溺無算是年夏李長庚攻牽於鹿耳門松年扼張坑返埕洋面獲賊船一沈船三又於水澳禽蔡三來等李長庚論水師將材舉松年可獨當一面總督阿林保以疏聞十二年從長庚擊蔡牽於大

星嶼浮鷹洋松年躍入賊船獲之被優叙十三年朱清潛匿東湧外洋命松年
躡勦遂移師入粵追至長山尾瞭見賊船四十餘知其最巨者爲清所乘併力
圍攻清受礮傷未幾斃詔嘉松年奮勇克殲渠魁賜花翎子雲騎尉世職粵匪
張保仔竄閩洋金門廈門松年遣漁船誘之以舟師圍擊獲船七沈船六被優
叙十五年傷發回籍尋丁母憂十九年授甘肅西甯鎮總兵歷延綏漳州天津
碭石諸鎮道光元年擢廣東陸路提督調福建水師提督六年臺灣械鬪松年
方閱兵弭壓解散總督孫爾準與之不協尋以治理輕縱被議褫職留臺効力
乞病歸卒於家子錫麟襲世職

黃標字殿臺廣東潮州人由行伍拔補千總擢守備乾隆五十五年艇匪肆掠
總督福康安議練水師募奇才異能者領之標技勇過人生長海壇習知水道
險易能久伏水底視物歷歷可數特被識拔以捕獲龍門洋盜及狗頭山匪功
擢都司署游擊嘉慶元年勦匪於南澎外洋獲李超勝等三十餘名仁宗素知
其名詔嘉緝捕勦能擢參將二下俘洋盜胡三臚等復擊斃安南匪首盡獲其

衆被優叙三年遷澄海副將未幾擢廣東左翼鎮總兵命總統巡洋水師責以肅清海盜四年勦匪大放雞山及雙魚桅夾門外洋殲獲甚衆賜花翎命繪像以進尋以盜劫鹽艘被劾詔原之六年復擊賊於南澎外洋獲田亞猛等七年偕提督孫全謀勦博羅會匪連破羊矢坑羅溪營要隘擣其巢事平優叙並被珍賚自將水師飲食寢處與士卒共先後獲匪六百餘名粵海倚爲保障八年偕孫全謀出海捕賊賊遁廣州灣標議合兵守隘俟賊糧盡可盡殲全謀慮持久有風濤患乃分兵賊得突圍逃出標歎曰此機一失海警未已憤懣成疾尋坐師久無功吏議奪職留任未幾卒自安南夷艇散後餘黨留粵者分五幫曰林阿發曰總兵保曰郭學顯曰烏石二曰鄭乙提督錢夢虎孫全謀皆庸材不能辦賊標歿後益無良將惟林國良許廷桂以死事聞國良福建澄海人世襲騎都尉授廣東碭石鎮標游擊累遷澄海副將繼標爲左翼鎮總兵十三年追勦烏石二於了洲洋擊沈數艘賊艦續至益多國良以傷殞優卹諡果壯廷桂廣東歸善人由行伍擢千總乾隆中從征臺灣累遷海門營參將國良歿護理

左翼鎮總兵十四年擊殲匪首總兵保於外洋圍其餘黨張保仔率大隊來援衆寡不敵廷桂死之賜卹予雲騎尉世職洎蔡牽既滅惟粵匪存於是百齡爲兩廣總督乃斷接濟整軍紀越一年勦撫以次定東南海氛始靖

論曰東南海寇之擾始末十有餘年惟浙師李長庚一人能辦賊以閩帥牽掣而阻成功然長庚忠誠勇略聞於海內上結主知廟算既孚乃專倚畀洎閩浙合力賊勢浸衰不幸長庚中列而王得祿邱良功等以部將承其遺志卒殲渠魁粵將惟黃標可用而未盡其才百齡乘閩浙殄賊之後勦撫兼施遂如摧枯拉朽要之海戰惟恃船堅礮利與斷接濟而已循之則勝違之則敗得失之林故無倖哉